

অক্ষুট

No. 402

[ঢাকা ইন্টারমিডিয়েট কলেজ হোস্টেল বাধিকী।]



প্রথম বর্ষ

মাঘ ১৩৩৩।

শ্রীভূপেন্দ্রনাথ দে

আবুল ফয়েজ খান চৌধুরী

সম্পাদকদ্বয়।

প্রকাশক—

শ্রীবীরেশচন্দ্র চক্রবর্তী
ঢাকা ইণ্টারমিডিয়েট কলেজ হোষ্টেল
রমনা, ঢাকা।

ঢাকা নয়াবাজার শ্রীনাথ প্রেসে
শ্রীস্বরেন্দ্রনাথ সেন দ্বারা মুদ্রিত

রজনীগন্ধার কোমল কচি পাপ্‌ড়িগুলি শিশিরে ভিজে চুপচুপে হ'য়ে যায়—তা'রা যেন গুমরে-কাঁদা রজনীর অশ্রু-ভেজা চোখের পাতা। প্রাণের আকুল তৃষ্ণা নিয়ে সূর্যমুখী সারটী দিন একদৃষ্টে আকাশের দয়িতের পানে তাকিয়ে থাকে—সূর্যের সমস্ত রশ্মির ঐশ্বর্য্য সে যেন আপনার বুকে টেনে আনবে। উষার সলাজ গুমোটে নিজের সমস্ত ঐশ্বর্য্য বিলিয়ে দিয়ে হেনা সাশ্রুনেত্রে প্রভাত-আলোর কাছে আপনার করুণ মিনতি জানায়। “অন্ধক্ষুট” গোলাপটী পর্য্যন্ত আক্রান্ত-যৌবনা ঘোড়শীর মত অতি যুত্মস্বরে প্রভাত-বায়ুর সাথে আলাপ ক'রে থাকে। “অক্ষুট” শুধু কুসুমের কারাগারে বদ্ধ হ'য়ে অদম্য আশা আকাঙ্ক্ষা বুকে নিয়ে নিজে নিজে গুমরে মরে। অসীম তা'র আশা, গভীর তা'র বেদনা, উদার তা'র প্রাণ, অনিন্দ্য তা'র সৌন্দর্য্য। সঙ্কার রক্তহারা অন্ধকারের বুক সে প্রাণ মাতানো রসের ফোয়ারা সৃষ্টি করতে পারে, উষার শিশির-ভেজা বাতাসের বুক সে প্রাণের কাঁপন লাগাতে পারে, অপরাহ্নের ঘামঝরা প্রকৃতিকে সে রঙের ফোয়ারায় স্নান করিয়ে শাস্তি ও প্রীতির সৌরভ-নিষেকে অভিষিক্ত ক'রে তা'কে অনিন্দ্য-সুন্দর মূর্ত্তিতে ফুটিয়ে তুলতে পারে। তা'র প্রতিভা-সৌরভ কুসুমের কারাগার হ'তে মুক্ত হ'য়ে প্রকাশের অভিসারে বেরিয়ে পড়তে উৎস্রীব হ'য়ে আছে। “কুঁড়ির” ভিতরে অন্ধ হ'য়ে গুমরে-কাঁদা গন্ধ আজ দখিণার নিবিড় আলিঙ্গনে আপনার সর্ব্বস্ব বিলিয়ে দিতে সমুৎসুক। উদ্ভানের নিভৃত কোণে রক্তহারা অন্ধকারে বদ্ধ বাতাসের উন্মত্ত কোলাকুলির মাঝে কলমের আঁচড়ে আঘাতে সে হাঁকিয়ে উঠেছে—আমরা তা'ই ছাপার আখরে তা'র প্রাণের বেদনা প্রকাশের অভিসারে পাঠাচ্ছি।

সূচীপত্র ।

বিষয়	লেখক	পৃষ্ঠা
১। নমস্কার (গল্প কবিতা)	শ্রীভূপেন্দ্রনাথ দে	১
২। রঙ্গের হোলী (কবিতা)	শ্রীভূপেন্দ্রনাথ দে	৪
৩। বন্ধুত্বের খাতির (গল্প)	মহম্মদ গোলাম ছোবহান	৬
৪। অর্থ নীতির একদিক (প্রবন্ধ)	আনোয়ার হোসেন	১৩
৫। মা (কথিকা)	শ্রীমাখনলাল কর চৌধুরী	১৬
৬। পোয়াপুত্র (গাথা)	শ্রীআশুতোষ ভট্টাচার্য্য	১৭
৭। গল্পগুচ্ছ (আলোচনা)	শ্রীবীরেশচন্দ্র চক্রবর্তী	২০
৮। মাটির টান (গল্প)	শ্রীআশুতোষ ভট্টাচার্য্য	২৬
৯। শক্তির বিকাশ (প্রবন্ধ)	আবদুল হামাদ খাঁ	৩১
১০। উড়ো চিঠি	শ্রীউনপকাশ শর্মা	৩৩
১১। সাঁঝাই (কবিতা)	শ্রীভূপেন্দ্রনাথ দে	৩৬
১২। হালী (জীবনী)	আবদুল কাদের	৩৭
১৩। দান (কবিতা)	শ্রীআশুতোষ ভট্টাচার্য্য	৪০
১৪। সাহিত্যে মৌলিকতা (গবেষণা)	শ্রীবীরেশচন্দ্র চক্রবর্তী	৪১
১৫। অক্ষুটের ডায়েরী	...	৪৫
১৬। পরিচয়	...	৪৮
১৭। আমাদের কথা	...	৪৯

অক্ষুট

১ম বর্ষ

মাঘ—১৩৩৩

১ম বর্ষ

নমস্কার।

(গদ্য কবিতা)

(১)

অনন্ত নীল সমুদ্রের নিবিড় অসীমত্বের মধ্যে তোমার জন্ম, হে মনোহর! জ্যোৎস্না মখিত করিয়া জল স্থল আকাশের সব সৌন্দর্য্য ছানিয়া সব মাধুরী বুকে লইয়া অপরূপ সৌন্দর্য্য স্রোতে ভাসিয়া তুমি চলিয়াছ। নদীর গতি দিয়া, ফুলের গন্ধ দিয়া, বসন্তের আনন্দ দিয়া তোমার অপরূপ তমুর স্রষ্টি, তারাতারা অনন্ত নীলাকাশ তোমারই নীল বাস; পাহাড়ের মাথায় মাথায়, শাল গাছের পাতায় পাতায় তোমারই বুকের রক্ত-বিন্দু উপল-মণির মত জ্বলিতেছে; ওই শতচ্ছিন্ন মেঘপুঞ্জ তোমারই শীর্ণ বিশীর্ণ চূর্ণকুম্বল, গোধূলীর রাঙা আলো তোমার মুখে লোভেরেণু মাখাইয়া দিয়াছে; এই প্রান্তরভরা রাঙা আলো তোমারই বুকের আগুন; তোমার স্বপ্ন-অঞ্চল বনে, পর্বতে, জ্যোৎস্নায় লুটাইতেছে, তোমারই অঙ্গের তরঙ্গে নানা ভঙ্গে লতিয়া লতিয়া ঐকিয়া ঐকিয়া ঘুরিয়া বেড়াইতেছে; তোমার দেহের সৌরভ পুষ্পে পুষ্পে আকুল হইয়া ছড়াইয়া পড়িতেছে; তোমারই চরণচাক্ষুসে ইটের রক্তে রাঙা পথের বুকে বাতাসের নৃত্য; তোমার টলমল ললিত যৌবন উচ্ছল বেগে নদনদী সরসীর বুকে ছল ছল করিতেছে; পদ্মে পদ্মে তোমারই ঐশ্বর্য্য দৃষ্টি; চাঁদের আলো তোমারই চিররহস্যময় আনন্দহাসির অমৃতধারা। এই রূপের বর্ণা, বর্ণের ধারা, রসের ফোয়ারা, অপরূপ রঙের ঝোরা নিরন্তর ঝরিয়া পড়িতেছে, আমি ক্ষুধিত চোখ দুটা ভরিয়া আনন্দে অহর্নিশ তাহা পান করি। অপরিসীম সুখ, অজানা বেদনা—বিশ্বের এই সৃষ্টিশক্তি প্রজাপতির পাখায় রঙীন করিয়া, ফুলের বুকে মধু ঢালিয়া, পাখীর কণ্ঠে

গান ভরিয়া, নারীর নয়নে মায়ার ফাঁদ পাতিয়া, কোটি কোটি তারায় বলমল চন্দ্রাতপতলে, সূর্য্যচন্দ্রের গমনাগমনের ছন্দে, ঋতুর পর ঋতু ফুলে ফুলে পা ফেলিয়া, জলে স্থলে কত শত রঙের উত্তরীয় উড়াইয়া তোমার যাত্রা। হে অরূপ! তোমাকে নমস্কার!

(২)

আমার চোখের সম্মুখে কত সুখ, কত আনন্দ, কত সৌন্দর্য্য, কত ছবি মূর্ত্ত হইয়া ভাসিয়া উঠিতেছে—খোকার হাসি, ছেলেদের খেলা, মায়ের স্নেহ, প্রিয়ার চাহনি, গায়িকার সুরালোকদীপ্ত আননপদ্ম, জ্যোৎস্না-রাত্রি তরুণ-তরুণী, মাধবীকুঞ্জে প্রেমিক-প্রেমিকা, আষাঢ়-মেঘের ঘন সমারোহ, শ্রাবণ-সাঁঝের অশ্রাস্ত অশ্রু বরিষণ, শরতের শ্যামশপ্পোর বুকে অশ্রু-বিন্দুর করুণ মিনতি, শীতের রৌদ্রতপ্ত মধ্যাহ্ন—এই সমুদ্রস্তনিত সুন্দরী ধরণীর পটে রঙের বর্ণালতার অসীম আনন্দ-সৌন্দর্য্য তুলিকা দিয়া প্রাণের শিখায় কত রঙ-বেরঙের দাগ কাটিতেছ। তোমার তুলির টানে নব নব রূপরেখা আঁকিয়া, মুছিয়া আবার নূতন রঙ্গে আঁকিয়া—অসীম ভূমি—অসীমের পথে চলিয়াছ; এক একটা পৃথিবী তোমার হাতের সৌন্দর্য্য-শতদলের এক একটা পাপড়ির মত ফুটিয়া অব্যোরে বরিয়া পড়ে। তোমার একহাতে সৃষ্টি আর এক হাতে লয়, এক হাতে প্রাণ আর এক হাতে মৃত্যু, এক হাতে সুখ আর এক হাতে গরল, এক হাতে ফুলের মালা আর এক হাতে বজ্র। এই রূপের জগতে বস্তুপুঞ্জ তোমারই মোহন কাঠির স্পর্শে ভাসিতেছে, গড়িতেছে, গলিতেছে, বরিতেছে, শূন্যে মিলাইয়া আবার নূতন নূতন ভাবে আবর্ত্তিত পরিবর্ত্তিত হইতেছে। হে সুন্দর! তারাতারা আকাশের তলায় উন্মুক্ত প্রকৃতির কোলে রূপকথার রাজ্যে দুয়ার খুলিয়া, আমার অন্তরের অনন্তকালের ঘুমন্ত রাজপুত্র তুমি, জাগিয়া উঠ,—এ গিরিবন লজ্জন করিয়া কোথায় কোন্ তেপান্তরের পানে উধাও হইয়া তুমি ছুটিতে থাক—অসীম তোমার আশা, দুর্জয় তোমার শক্তি, দুর্গম তোমার পথ, অনন্ত কালের জন্ম তোমার যাত্রা; পতন-অভ্যুদয়-বন্ধুর পথে তোমার অনন্ত রথ-চক্রের অবিশ্রান্ত ঘর্ষের শব্দের কম্পন রাখিয়া অনন্ত সৌরজগতে সুখ-দুঃখ, সৃষ্টি-লয়ের অকারণ বঙ্কা বহাইয়া, অনন্ত কালের যাত্রী, তুমি অনন্তের পানে চলিয়াছ। হে বিনোদ! উষার স্নিগ্ধ রঙিন চাহনিতে, সন্ধ্যাপ্রসুতিত রজনী-গন্ধার তীব্র সৌরভে, ছোট শিশুর কচি প্রাণখোলা হাসিতে, মায়ের বুকভরা স্নেহে, প্রিয়ার চাহনিতে, কুহুর ছন্দে, নারীর চোখে, আকাশে বাতাসে সর্বত্র তোমার অভিব্যক্তি। হে বিশ্বশিল্পী! তোমাকে নমস্কার।

(৩)

হে মনোহর! বিশ্বলীলাকমল হাতে করিয়া, কোন্ আনন্দে মাতোয়ারা হইয়া তুমি হাসিতেছ। আকাশ বাতাস তোমার সেই হাসির হিল্লোলে চারিদিকে অপূর্বমাধুর্য্য ফুটাইয়া তুলিয়াছে। অপূর্ব সুন্দর তোমার আনন-পদ্মে, চক্ষে, গণ্ডে কিসের দীপ্তি বলসিয়া উঠে।

মুখের রঙ কখনো পদ্মরাগের মত রাঙা, কখনো শুকনা পাতার মত কালো, কখনো পলাশের মত জ্বল্ জ্বল্; আমার মনের ছন্দে, গানে তোমার দেহ লীলায়িত। তোমার আঙুল—যেন আগুনের শিখা; সব চেয়ে সুন্দর তোমার সারঙ্গ নয়ন— কখনো হাসির আলো, কখনো স্বপ্নের মায়া, কখনো দীঘির কালো, কখনো মেঘের ছায়া। তোমার চক্ষু-তারকায় যে আলোর ফিনিক্ জ্বলিতেছে তাহা সূর্যের নয়, চন্দ্রের নয়, তারার নয় — বিদ্যুতের; তাহার দিকে চাহিলে সমস্ত জগৎ প্রাণময় প্রেমময় হইয়া উঠে। তোমার হাসির সুরে শুক ক্লক রক্ত-মাটি হইতে সবুজ তৃণ মুখ তুলিতেছে, গাছে গাছে ফুল রঙীন হইয়া ফুটিয়া উঠিতেছে, পাহাড়ে পাহাড়ে বর্ণার হৃদঙ্গ বাজিতেছে, নিশার মোহন রূপের ফোয়ারার ভিতর বিশ্বশতদললীনা অনন্ত-যৌবনা অনন্তউর্বসীর জ্যোৎস্নাহাসির রঙের ঝোরায় বিশ্বের অঙ্গনতলে তোমারই কোটি কোটি রঙ-বেরঙের আরতি প্রদীপ জ্বলিয়া উঠে। বিশ্বের বস্তুপুঞ্জ, মানব হৃদয়ের গহন কোণে, আনন্দে, সৌন্দর্য্যে, সবার উপর তোমার হাসির রঙের ধারা। অফুরন্ত তোমার রূপের ফোয়ারা, অফুরন্ত আমার হৃদয়-পেয়ালা, আমি ধন্য। হে সুন্দর! অবিশ্রান্ত রূপের স্রোতে ও অফুরন্ত রঙের ফোয়ারার মাঝে তোমার প্রসন্ন মুখের স্নিগ্ধ হাসি দেখিয়া আমার নয়ন মন সার্থক। হে বিশ্ববিধাতা! আমার ক্ষুদ্রতার ক্ষোভ ও অক্ষমতার ক্লেশ ঘুটাইয়া বর্ষে বর্ষে নূতন নূতন রূপদানে বিশ্বের ঘারে ঘারে আমাকে বিলাইয়া দাও। তরুন প্রাণের নিবিড় আবেগভরা অঞ্জলি বহিয়া আনিয়াছি আমি, হে অসীম! তোমার পায়ে উপহার দিতে। কচি প্রাণের কোমলতাসিক্ত বড় কোমল লজ্জাবতীলতার মত নমনীয় আমি—হে সুন্দর! উষার রঙিন মাধুর্য্যে ও সাঁঝের নিখুম মসৃণতার আন্তরণে তুমি আমাকে স্পর্শ কর। সেই স্পর্শে আমি উজ্জ্বল চিত্রের মত ফুটিয়া উঠিয়া তোমার চোখে মুখে অপূর্ব বর্ণবিভা ফুটাইয়া দিই। তুমি কামনার উদ্বেগে, নিষ্ফলতার নিশ্বাস প্রবাহে, অক্ষমতার ক্ষোভে, চিন্তার চঞ্চলতায় আমার হীনতা, দীনতা ও অক্ষমতা হইতে ক্ষরিত হইয়া অপূর্ব মূর্তিতে ফুটিয়া উঠ। হে বিশ্বশিল্পী! তোমাকে নমস্কার!

শ্রীভূপেন্দ্রনাথ দে।

রঙের হোলী ।

(১)

রঙ জাক্রান	টুকটুকে লাগ	আবেশ বিভোল	আসুমানে
নীল দরিয়ার	রঙের জাহাজ	দোল খেয়ে যায়	আনমনে
রঙিন সাঁঝে	আকাশ গাঙে •	পানসী চলে	পালবেয়ে
রঙ-মহলের	রঙের ঝিলিক	ছাড়বে সে কি	অঙ্গে এ !
আনু'কো আলোর	বর্ণা-ধারায়	অপ্রাজিতার	বুকদোলে
গন্ধ হাসে	অঙ্গনেতে	তুলসী তলে	ধূপগলে ।
কল্লনা আজ	যাচ্ছে উড়ে	হালকা হাওয়ায়	কোনু ধ্যানে
ঝাপসা সাঁঝে	স্বর চলেছে	কোন রূপসীর	সন্ধানে ।

(২)

সিঁ ছুর মাখা	বর্ণাধারায়	নীলদরিয়ার	বুকভরি
স্বপন কোটের	দেব কনেরা	মারছে রঙের	পীচ্কারি ।
নিখিল কবির	দিলদরিয়া	উথলে ওঠে	তোর গানে
ও প্রকৃতি	তোর গানে যে	ফুল ফুটেছে	অঙ্গনে ;
ও গরবী	ওই মুখে তোর	প্রেমের বাণী	তায় লেখা
কাণ্ডুয়া কাগে	রঙিন রাগে	বিভোল আঁখি	যায় দেখা ।
পড়তে নারি	কি লেখা তোর	জ্বলছে হোখা	হৃদকোষে
চোখে আমি	ঝাপসা দেখি	আক্সে মরি	আক্সোষে ।

(৩)

ও প্রকৃতি	রঙ-সায়রে	রাখলি কি তোর	গাল তাতে
কিংবা চুমোর	গাল দুটি তোর	উঠলো রেঙে	আলতাতে ?
তোর বুকের ওই	গোপন কোণের	স্বপ্ন-জড়া	ফুল বনে
মুখ ক'রে	বিভোল ক'রে	রাখ লুকিয়ে	এই দীনে ;

এ ছনিয়ার	নোংরা চালে	চলছে জীবন	একটানা
তার মাঝে আজ	উঠলো কি ঢেউ	দখিণ হাওয়া	দেয়হানা,—
বলক দিয়ে	ক্ষীর-সায়রে	পুলক ছোটো	হর্ষেতে
কোন রূপসীর	নিকষ প্রেমের	কাঁপন লাগে	স্পর্শেতে ।

(৪) .

দিন গোলামীর	নিকাশ আজি	চিন্ত নাচে	উল্লাসে
বাতিল হল	সব বকেয়া	লাগছে তারি	জেল্লাসে,
বুক ভরে মোর	নিকষ রাঙা	শোণিত ওঠে	চঞ্চলি'
হৃদ সায়রের	অখই জলে	উঠছে ঢেউ	কল্লোলি,
চম্কা রঙে	ঝলসে দু-চোখ	আজ এ ধরার	খোসরোজে
প্রাণের টানে	প্রিয়তমার	অভিসারে	চলছি যে ।
ও দেমাকী	তুই কি নাকি	আলোর রাঙা	স্বর্গপুর
অর্থ্য আজি	ধর গো হাতে	দুখের নিশা	করগো দূর ।

ত্রিভূপেন্দ্র নাথ দে ।

বন্ধুত্বের খাতির

(১)

প্রায় সকল ছেলেরাই আমাকে অহঙ্কারী বলিত ও একটু যেন বিতৃষ্ণার চোখে দেখিত। বাস্তবিক আমি অহঙ্কারী ছিলাম কিনা জানি না; কিন্তু আমার প্রকৃতিই যেন কেমন ছিল। আমি যাচিয়া কারও সঙ্গে পরিচয় করিতে পারিতাম না, করিতে ইচ্ছাও করিত না, করিবার সুবিধাও পাইতাম না।

ছোট বেলায় মা মরিয়া গিয়াছিলেন, বাবাই আমাদের দুই ভাই-বোনকে মানুষ করিতেন। বাবার এক ছোট বিধবা ভগ্নী ছিলেন। তিনিই আমার ছোট বোনটিকে আগলাইতেন ও আমাদের জন্ত রান্না করিতেন। বাবাই আমাকে পড়াইতেন। তাঁর সঙ্গে প্রত্যহ স্কুলে যাইতাম। তিনি ও ঐ পথে তাঁর আফিসে যাইতেন। ৪ টায় আফিস হইতে ফিরিবার পথে আমাকে আবার লইয়া আসিতেন। যেখানে যাইতে চাহিতাম তিনি আমাকে সেখানে লইয়া যাইতেন। বাহিরের ছেলেদের সঙ্গে মিশিতে পারিতাম না।

পড়ার উপর আমার খুব ঝোঁক ছিল। বাবাও আমাকে পড়া ছাড়া আর কোন কাজই করিতে বলিতেন না। খেলার সময় খুব কমই মিলিয়াছে, কেবল বৈকালে বাবার সঙ্গে ঘণ্টা দুই খোলা মাঠে বেড়াইয়া আসিতাম।

ক্লাশে আমি ছিলাম ফার্স্ট বয়। স্কুলে কোন সময় ছুটি পাইলে লাইব্রেরীতে যাইয়া পুস্তক পড়িতাম। অন্তঃসময়ে কোন ছেলে আমার সহিত গল্প করিতে পারিত না। এই সময়ে যদি কেউ আসিত তবে হয়ত পড়িতে পড়িতেই হাঁ-না ভাবে উত্তর দিতাম। তা'তে ছেলেরা আরও চটিয়া যাইত এবং আমার অদ্ভুত অদ্ভুত নাম রাখিত। আমাদের ক্লাশের করিম আমাকে 'কুপ-মণ্ডুক' এই অদ্ভুত নামটি দিয়াছিল। তার একটু ইতিহাস আছে।—সেবার এক ম্যাজিকওয়ালা আমাদের স্কুলে ম্যাজিক দেখাইতে আসে; তাসের 'ইস্কাবনের গোলাম' 'up' 'up' বলিলে কেমন করিয়া উপর দিকে উঠিতে থাকে, দেখিয়া আশ্চর্য্যান্বিত হইয়াছিলাম, হয়ত বা করিম এবং আরও কয়েকটি ছেলের নিকট আমার এই অজ্ঞতার কথা প্রকাশ করিয়া ফেলিয়াছিলাম। সে মনে করিয়াছিল——সামান্য তাসের ম্যাজিক যে কোন দিন দেখে নাই, সে ঐ নাম পাইবার উপযুক্ত। তাহাতেই করিম আমার এই অদ্ভুত নামটি দিয়াছিল।

রাস্তায় ছেলেরা আমাকে দেখিলে এমনি ভাবে ডাকাইত; ভাবটা এই রকম, যেন—— এইরে আমাদের ক্লাশের সেই——। এমনি ভাবেই ক্লাশের বাহিরে এবং ভিতরে অদ্ভুত উপাধি এবং ছেলেদের অদ্ভুত ধরণের চাওয়াচাওয়ির মধ্য দিয়া আমার দিন কাটিতেছিল, কিন্তু

এরূপভাবে আমাকে বেশী দিন কাটাইতে হয় নাই। কারণ আমি ম্যাট্রিক পরীক্ষায় পাশ করিয়া ফেলিলাম এবং প্রায় সকলের সঙ্গেই বিচ্ছেদ ঘটিয়া গেল।

(২)

পরীক্ষার ফল বাহির হইলে দেখিলাম ২০ টাকা বৃত্তি পাইয়াছি। বাবার অবস্থা স্বচ্ছল ছিল না। ৩৫ বেতন এবং ২০ বৃত্তির উপর নির্ভর করিয়া বাবা আমাকে প্রেসিডেন্সী কলেজে পড়াইবার ইচ্ছা প্রকাশ করিলেন।

এক আত্মীয়ের সঙ্গে কলিকাতায় আসিলাম। আত্মীয়টি আমাকে প্রেসিডেন্সী কলেজে ভর্ত্তি করিয়া দিয়াই বাড়ী চলিয়া গেলেন।

বাবা বাড়ী হইতে আসিবার কালে কেবল একটি কথা বলিয়াছিলেন—‘মন দৃঢ় কর।’ মন দৃঢ় করা আমার পক্ষে কঠিন ছিল না। কারণ বাবার নিকট হইতে সে শিক্ষা পাইয়াছিলাম। কিন্তু, তবুও প্রথমে যেন কেমন হইয়া গেলাম। রাস্তা দিয়া অসংখ্য লোক চলিয়াছে; সকলেই যেন কোন্ অপরিচিত জায়গায় আসিয়া পড়িয়াছে। সকলের মুখেই ব্যস্ততার লক্ষণ,—যেন ইহারা ছুটিতেই থাকিবে, যেন ইহাদের বিরাম নাই, বিশ্রাম নাই, দিন রাত্রি হাওয়া গাড়ী ও ট্রামের শব্দ, হঠাৎ এই জনতরঙ্গ এবং কল-কোলাহল-মুখরিত জায়গায় পড়িয়া মনটা যেন থাকিয়া থাকিয়া খাবি খাইতে লাগিল। মনে হইতে লাগিল,—যেন কত গভীর জলের মাছ অত্যন্ত কড়া-শুকনা ডাঙ্গায় আসিয়া পড়িলে যেমন হয়, ঠিক তেমন হইয়াছি। কিন্তু এরকম ভাব বেশী দিন রহিল না, কারণ বাবার সেই ‘মন দৃঢ় কর’ কথাটি মনে পড়িয়া গেল।

প্রথম যেদিন ক্লাশে ঢুকিলাম, দেখি—কত অপরিচিত মুখের মধ্যে আসিয়া পড়িয়াছি। বুঝিলাম এখানে স্কুলের সেই ‘উপাধি’ দিবার লোক নাই। প্রত্যেকে প্রত্যেকের পরিচয় লইতে ব্যস্ত, কেবল আমি কারও সঙ্গে পরিচয় করিতে পারিলাম না। সেই ‘যাচিয়া পরিচয়’করাটা তখনও বোধ হয় আমার প্রকৃতির বাহিরে ছিল, কিন্তু তবুও দুই একটি ছেলে আমার পরিচয় লইতে ক্ষান্ত রহিল না।

ক্লাশের মধ্যে একটি ছেলে ছিল প্রসিদ্ধ। উজ্জ্বল গৌরবরণ, ছিপ্‌ছিপে গড়ন, দিবি চোহারা, পড়াশুনায় মোটের উপর সে ভালই ছিল। কিন্তু আরও মজবুত ছিল সে গল্পে এবং হাসি-খুসিতে। দেখিতাম ক্লাশে আসিলেই তাহাকে লইয়া ছেলেদের মধ্যে যেন কাড়াকাড়ি পড়িয়া বাইত। তার নাম ছিল ‘আমীর সেহাব উদ্দিন,’—সে ছিল এক জমিদারের ছেলে। কিন্তু ছেলেরা তাকে “আমীর” বলিয়াই ডাকিত। মুখের সঙ্গে পরিচয় থাকিলেও আমার সঙ্গে তার মুখোমুখি পরিচয় ছিল না। আমি messএ থাকিতাম, কলেজ হইতে আমাদের mess বেশী দূরে ছিল না। প্রায়ই হাটিয়া আসিয়া কলেজ করিতাম, তবে কোন দিন দেবী হইলে ট্রামে চড়িতাম।

স্কুলের মতই সেদিন Common-Roomএ বসিয়া 'The Herald of the French Revolution' নামে একখানা পুস্তক পড়িতেছিলাম। পড়িতে পড়িতে এতই তন্ময় হইয়া গিয়াছিলাম যে, কখন কলেজের ছুটি হইয়া গিয়াছে এবং কখন কলেজের হট্টগোল খামিয়া গিয়াছে, কিছুই টের পাই নাই। যখন টের পাইলাম, তখন টিপ্ টিপ্ করিয়া বৃষ্টি পড়িতেছে। অদূরে রাস্তার উপর গ্যাসের আলো জ্বলিতে বেশী বাকি নাই। এমন আঁধার হইয়া আসিয়াছে, যা আমি ঘরের মধ্যে electric light থাকাতে বুঝি নাই, মনে হইল যেন কে একটা খুব ঘন আঁধারের যবনিকা সমস্ত কলিকাতার উপর টানিয়া দিয়াছে।

ব্যস্তসমস্ত হইয়া সিঁড়ির কাছে আসিয়া দেখি নীচে একটা মটর দাঁড়াইয়া। বৃষ্টি ধরিলে যাইব কিনা ভাবিতেছি এমন সময়, কোথা হইতে আসিয়া, আমাদের ক্লাশের সেই 'আমীর' বলিল—“এস ভাই, আমার মটরে উঠে এস, আমি তোমাকে তোমার messএ পৌঁছে দেব”। তাদের বাসা কলেজ হইতে বেশী দূরে ছিলনা। সে মটরে আসিত, তাহা আমি জানিতাম, কিন্তু যার সঙ্গে আমার পরিচয় নাই বলিলেই হয়, সে যে আমাকে একরূপ ভাবে নিমন্ত্রণ করিবে, তাই আমি একটু আশ্চর্যের সহিত ভাবিতেছিলাম।

কিন্তু সে আমাকে ভাবিবার সময় দিলনা ‘কেন ভাই বৃষ্টিতে ভিজে যাবে, আমিও ত ঐ পথেই যাব, এস ভাই,’ বলিয়া একরকম জোর করিয়া আমাকে মটরে তুলিয়া লইল এবং ‘বাড়ী চালাও’ বলিয়া সোফারকে লকুম করিয়া দিল। বাধা দিলে সে বলিল, ‘মেসে পৌঁছে দিলেই ত হল’? মটর চলিতে আরম্ভ করিলে সে বলিল, ‘যদিও ভাই তোমার সঙ্গে আমার কোনদিন কথাবার্তা হয় নাই তথাপি আমি তোমার সঙ্গে আলাপ করিবার সুযোগ খুঁজিতেছিলাম’।

আমি বলিলাম, ‘যদিও আপনার সঙ্গে————’ সে বাধা দিয়া বলিল, “আপনি’ কেন ভাই, আমাকে তুমি ‘তুমি’ করেই বল’।

দুই একটি কথার পর মটর তাদের বাড়ীতে আসিয়া পৌঁছিল! বুঝিলাম জমিদারেরই বাড়ী বটে। তার পড়ার ঘরের মধ্যেই আমরা বসিলাম। আমাদের আসার আগেই ঘরের মধ্যে আলো জ্বালা হইয়াছিল। সে একটি সোফার উপর বসিয়া পড়িল। একটি চাকর, কোথায় জানি গিয়াছিল, আমাদের কথা শুনিয়া ছুটিয়া আসিয়া আমীরের পায়ের নিকট বসিতে যাইতেছিল, তাকে চোখের ইসারায় জলখাবার আনিবার অহিলায় সরাইয়া দিল। কিন্তু এটুকু আমার চোখ এড়াইতে পাড়িল না।

গল্প করিতে করিতে সে আমার বাড়ীর সব কথা শুনিয়া লইল। সেও যে বাপের একমাত্র ছেলে এবং তারও যে মা নাই তাও এর সঙ্গে জানাইয়া দিল।

জল খাবার পর আমাকে মটরে চড়াইয়া দিয়া বার বার করিয়া বলিয়া দিল যে, আমি যেন যখন ইচ্ছা তখন তার বাড়ীতে যাই এবং এটা যেন আত্মীয়ের বাড়ী মনে করি।

তার ব্যবহারে এবং কথা বার্তায় এতই আশ্চর্য্যান্বিত হইয়া গিয়াছিলাম যে একটা ভদ্রতা সূচক চিহ্ন পর্য্যন্ত দেখাইতে পারিলাম না। মটর চলিতে শুরু করিলে তার আজিকার এই পরিচয় এবং আত্মীয়তার বিষয়, কেমন ভোজবাজীর মত কি হইল ভাবিতে ভাবিতে সমস্ত রাস্তা কাটাইয়া দিলাম।

নিজের ইচ্ছায় না হইলেও তখন হইতে প্রায়ই তার বাসায় যাইতে হইত। কিন্তু এই যাওয়াটা ক্রমে এমন হইয়া দাঁড়াইল যে—আমি না হইলে তার শনিবারে Botanical garden excursion এ যাওয়া এবং ছুটির দিনে কলেজ-স্কোয়ারে সাতার দেওয়া কিছুই ঘটিয়া উঠিত না। ক্লাশে আসিলেও সে আমার কাছে বসিত। তাহাতে আমাতে এমন ভাব হইয়া গেল যে আমরা ছেলেদের আলোচনার বিষয় হইয়া পড়িলাম। সকলে আমাদের ‘মাণিকজোড়’ নাম রাখিল। লোকে আমাদের সহোদর বলিয়া ভাবিয়া লইয়াছিল। মনে হইয়াছিল বুঝি এ বন্ধু চিরদিন এই রকম থাকিবে—কোন দিন ভাঙ্গিবে না। যার সঙ্গে আমার কোন দিন পরিচয় ছিলনা, সেই যে এতবড় পরিচিত এবং বন্ধু হইয়া দাঁড়াইতে পারে তা পূর্বের কে ভাবিতে পারিয়াছিল? কিন্তু তখন জানিতে পারি নাই যে এই পরিচয় হইতে আত্মীয়তা এবং আত্মীয়তা হইতে বন্ধু-সূত্র ভবিষ্যতে কোন্ মায়ার প্রভাবে এবং কিসের নেশায় বৃদ্ধদের মত উড়িয়া যাইবে! কে জানিত, কলেজের দিনের এই আত্মীয়তা ভালবাসার কথা, ভবিষ্যতে যখন এমন এক দিন আসিবে, তাহার নিকটে মুখ ফুটিয়া প্রকাশ করিতেও পারিব না! তার কাছে নিজের পরিচয় দিতেও কুণ্ঠা বোধ করিব!

(৩)

সাত বৎসর পরের কথা। এম, এ পাশ করিবার পর, কোন চাকরী-বাকরী না পাইয়া এখানে ওখানে ঘুরিয়া ফিরিয়া বেড়াইতেছিলাম। বাবা ছোট বোনটিকে বড় করিয়া, আমি যখন sixth year এ পড়ি তখন, তাহার বিবাহ দিয়া মারা যান।

সে বার জ্যৈষ্ঠ মাসের শেষের দিকে আমাদের বাড়ী হইতে ক্রোশ পাঁচেক দূরে আমার মামার বাড়ীতে বেড়াইতে গিয়াছিলাম। অনেক দিন পরে গিয়াছি, অত্যধিক আদর পাইলাম।

সেদিন সকালবেলা বাহিরের ঘরের বারান্দার উপর বসিয়া প্রান্তর্ভোজন সারিয়া মামা ও আমি ঐ গ্রাম সম্বন্ধেই গল্প করিতেছিলাম। গ্রামের জল-বায়ু, হিন্দু-মুসলমানের সংখ্যা ও শিক্ষা সম্বন্ধে অনেক তথ্যই জানিয়া লইতেছিলাম। মামাও যথাযথ ভাবে উত্তর দিতে ছিলেন। জমিদারের কথা বলায় তিনি হঠাৎ খুব গভীর হইয়া গেলেন এবং ধীরে ধীরে বলিলেন ‘গ্রামের সবই ভাল বটে কিন্তু এখানকার নূতন জমিদার ভয়ানক অত্যাচারী’, একটু খামিয়া বলিলেন, ‘এ গ্রাম

অল্প দিনের মধ্যে উচ্ছন্ন যাইবে। এঁর কাছে কোন বিচার-আচার পাবার যো নাই। শুনিয়াছি তিনি সব সময় নাকি গান-বাজনা, মদ—এই সব লইয়াই থাকেন। এতদিন কলিকাতায় ছিলেন; হঠাৎ কেন যে গ্রামের বাড়ীতে আসিলেন তিনিই জানেন’ বলিয়া দুঃখ প্রকাশ করিলেন। জমিদারের নাম জিজ্ঞাসা করায় বলিলেন, “নাম সেহাব উদ্দিন চৌধুরী। শুনিয়াছি তিনি খুব লেখা পড়া জানেন।” নাম শুনিয়া আমি আশ্চর্য্যান্বিত হইয়া গেলাম। প্রায় বৎসর খানেক হইল কলেজের সেই ‘আমীর সেহাব উদ্দিনের’ কোন সংবাদই পাই নাই। Fifth year এ যখন সে পড়ে তখন তার বাপ মারা যান এবং সেও পড়া ছাড়িয়া দেয়। পড়া ছাড়ার পরেও তার সঙ্গে আমার সেই ভাবই ছিল। এম, এ পাশ করার পর গ্রামে বসিয়া মাঝে মাঝে তার সংবাদ পাইতাম। কিন্তু ক্রমে ক্রমে কেন যে তার চিঠি কমিয়া আসিতে লাগিল, এবং শেষের দিকে, কেন জানি না, চিঠি লিখিলেও তাহার কোন উত্তর পাওয়া যায় নাই, বুঝিতে পারি নাই। নানা জায়গায় ঘুরিয়া বেড়াইবার দরুণ তার কোন সঠিক খবর জানি নাই। এই এক বৎসরের মধ্যে তার কথা প্রায় ভুলিয়াই গিয়াছিলাম। কিন্তু আজ হঠাৎ তার নামের মত নাম শুনিয়া সব কথাই মনে পড়িয়া গেল। কিন্তু ভাবিলাম দুই জনের কি এক নাম হইতে পারে না? আবার ভাবিলাম তার নামের আগে ‘আমীর’ ছিল, এ সে নয়। আবার সংশয় হইল, এ জমিদার, সেও জমিদার ছিল, —তার নামের মত নাম, —এ যদি সেই হয়! ‘এ যদি সে হয়’ ভাবিয়া কিছুই মনে মনে উত্তর ঠিক করিতে পারিলাম না। তবে এটা ঠিক করিলাম যে এই জমিদারের সঙ্গে একবার দেখা করা দরকার।

মামার সঙ্গে আর কোন কথা হইল না, আমার ভিতরকার চিন্তার কথাও প্রকাশ করিলাম না। কেবল ‘জমিদার কোন্ গ্রামে থাকেন’ জিজ্ঞাসা করাতে বলিলেন, ‘আর একটা গ্রাম পারেই তাঁর বাড়ী’। আমার মুখের দিকে কিছুক্ষণ তাকাইয়া থাকিয়া বলিলেন, ‘তুই তাঁকে চিনিস্ নাকি? তিনি কলিকাতার কোন্ কলেজে পড়িতেন। তুই দেখা কর্তে চাস্?’ আমি একটি কথাও বলিলাম না দেখিয়া, তিনি নিজেই কিছুক্ষণ মৌন রহিয়া বলিলেন, ‘তুই আর কি দেখা করবি। তাঁর দেখা পাওয়াই ভার। তিনি কারও সঙ্গে প্রায়ই দেখা করেন না’ বলিয়া উঠিয়া গেলেন। আমি মনে মনে ঠিক করিলাম বাড়ী যাওয়ার পূর্বে চাকুরীর উমেদারী সম্পর্কে জমিদারের সঙ্গে একবার দেখা হওয়া চাই ই। অন্ততঃ মানুষটা ত যাচাই করিতে হইবে।

সেদিন সমস্ত দিন ধরিয়া মেঘ করিয়া ছিল। বৈকালে সন্ধ্যা পথ ধরিয়া, আল ডিঙ্গাইয়া দেখা করিতে চলিয়াছিলাম। হঠাৎ মেঘের মধ্য হইতে সূর্যের একেবারে ডুবিয়া যাওয়ার পূর্ব্বেকার শেষ আরক্ত আভাটুকু আধ-পাকা ধানের উপর আসিয়া পড়িয়াছিল। জোরে হাওয়া বহিতেছিল, কখন যে বৃষ্টি আসিবে ঠিক ছিল না। আমি তাড়াতাড়ি চলিতে লাগিলাম।

মাঝের গ্রামটি পার হইয়া একটি বড় রাস্তার উপর আসিয়া একটি লোককে জিজ্ঞাসা

করলাম, ‘বাপু, এ গাঁয়ের জমিদারের বাড়ী কোথায় বলতে পার?’ সে আমার মুখের দিকে এমন করিয়া কিছুক্ষণ তাকাইয়া রহিল যেন আমি তাহাকে কিছু খুব খারাপ কথা বলিয়াছি। ‘এই পথে যাও, তাহলে পাবা’ বলিয়া সে এক রকম দৌড়াইয়াই সরিয়া গেল। আমি আরও কি বলিতে যাইতেছিলাম কিন্তু তখন সে অনেক দূর চলিয়া গিয়াছে।

ঐ পথে কিছু দূর চলিয়া একটি বড় বাড়ী দেখিতে পাইলাম; কাছেই একটি লোককে দেখিয়া জিজ্ঞাসা করাতে ‘এই জমিদারের বাড়ী’ বলিয়া দেখাইয়া দিল।

চতুর্দিকে পাকা প্রাচীরের মধ্যে বাড়ী। বাড়ীতে চাকর-বাকর ছাড়া আর কেহ আছে বলিয়া মনে হইল না। গেটের কাছে ‘গোরখপুরী’ দারওয়ান দেখিলাম, গেটের নিকটে দাঁড়াইতেই সে যেন পাগলা কুকুরের মত দৌড়াইয়া আসিল। জিজ্ঞাসা করিল, ‘কিয়া মাজ্‌তা হয়?’ জমিদারের সঙ্গে দেখা হইতে পারে কিনা বলিলে, সে উত্তর করিল, ‘সাব ত হিঁয়া নাহি রহ তা’। রশি দুই দূরে একটি বাড়ী দেখাইয়া বলিল, ‘ঐহি সাবকা খাস মোকান হয়।’ আর কিছু না বলিয়া ঐদিকে চলিলাম। তখনও দিনের আলো নিভিয়া যায় নাই। তাহাতেই বুঝিলাম ঐটি ঠিক বাড়ী নহে, একটি ‘বান্সালা’। চতুর্দিকে তারের বেড়া। হয়ত আগে বাগান ছিল, কিন্তু দুই একটি শুষ্ক গাছ ছাড়া এখন কিছুই নাই। গেট ঠেলিয়া, অপরিসর কাঁকর-মাটি মিশানো পথ বাহিয়া যখন ‘বান্সালার’ বারান্দায় আসিয়া দাঁড়াইলাম, তখন উপরের তালায় কে যেন হারমোনিয়ম বাজাইতেছিল; নীচে কাহাকেও দেখিলাম না। একটু আশ্চর্য্যাস্থিত হইলাম — জমিদার। একটি বড় ঘরের মধ্য হইতে সামান্য একটু আলো আসিতেছিল। বুক দুর্দুর্দু করিয়া কাঁপিতে লাগিল। বুঝিলাম আমার কথাই ঠিক।

তখন অন্ধকার হইয়া আসিয়াছে। বারান্দার একটি টুলের উপর বসিয়া ‘কি করিব’ ভাবিতেছিলাম, হঠাৎ উপরের বাজনা বন্ধ হইয়া গেল, এবং কিছু পরেই আমার নিকটেই পাশের কামরা খুলিয়া একটি লোক বাহির হইয়া আসিল। প্রথমে সে আমাকে দেখিতে পায় নাই। সে বোধ হয় কোন কাজে নীচে আসিয়াছিল। সে চলিয়া যায় দেখিয়া তার নিকটে যাইয়া দাঁড়াইতেই সে যেন একটু কেমন হইয়া গেল, তা ঐ স্বপ্ন আলোর মধ্যেই লক্ষ্য করিলাম। দেখিলাম সে বোধ হয় সাহেবের পশ্চিমা মুসলমান খানসামা হইবে। তাজ্জব হইয়া সে আমাকে জিজ্ঞাসা করিল—আমি কি চাই। সাহেবের সঙ্গে দেখা হইতে পারে কিনা জিজ্ঞাসা করায় সে বলিল, ‘সাহেব কিসিকা সাৎ মোলাকাত্ নেহি কর্তা হেঁ।’ আমি বুঝাইলাম যে সাহেবের সঙ্গে আমার বহুৎ দোস্তী আছে। তখন সে আমার নিকট হইতে ‘কার্ড’ চাহিয়া বসিল। কাগজ কালী চাহিলে সে আমার আপাদ মস্তক একবার বিশেষ ভাবে নিরীক্ষণ করিয়া কাগজ কালী আনিয়া দিল। নাম-লিখিত কাগজটুকু লইয়া সে উপরে চলিয়া গেল। আমি বসিয়া বসিয়া আকাশ-পাতাল ভাবিতে লাগিলাম। প্রায় মিনিট বিশেষ পর আসিয়া সে জানাইয়া দিল

যে 'সাহেবের সাথে মোলাকাৎ নেহি হোগা, সাহেব আরাম কর্তা হায়'। আমি হাল ছাড়িলাম না। বুঝাইলাম, যেহেতু সাহেব আমার আত্মীয় হয়, স্ত্রীরাং উপরে গিয়া দেখা করিলেও কোন দোষ নাই। সে, ভজ-পোষাক পরিহিত দেখিয়াই হউক কিম্বা আত্মীয়তার দোহাই মানিয়াই হউক, কি ভাবিয়া শেষে লইয়া যাইতে সম্মত হইল। সিঁড়ি বাহিয়া উপরে উঠিয়া একটি বড় ঘর দেখাইয়া দিয়া সে অল্প দিকে সরিয়া গেল।

ঘরের মধ্যে বেশ উচ্চ হাশু শুনা যাইতেছিল। কিছুক্ষণ চুপ করিয়া থাকিয়া আস্তে আস্তে ঘরের মধ্যে যাইয়া দাঁড়াইলাম। মেঝে-জোড়া কার্পেট পাতানো। খুব বড় একটি ঝাড় লণ্ঠন ঠিক ঘরের মাঝখানে জ্বলিতেছিল। ঘরের একধারে সর্বপ্রথমে যার উপর চোখ পড়িল সে একটি যুবতী—গ্রাসে মদ ঢালিতেছিল। আমাকে দেখিয়া কুণ্ঠিত চিত্তে মদ ঢালা বন্ধ করিয়া গ্রাস নামাইয়া রাখিল। একটু দূরে বৃত্তাকারে চার পাঁচ জন লোক দরজার দিকে পিঠ করিয়া বসিয়াছিল, তাহারা আমাকে দেখিতে পায় নাই। যুবতীটি কি যেন বলিল, শুনিতে পাইলাম না। সকলে এক সঙ্গে মুখ ফিরাইতেই যাহাকে দেখিলাম, তাহাতে একেবারে কাঁঠ হইয়া গেলাম। দেখিয়াই চিনিতে পারিলাম, এ 'সেই' আমীর সেহাব উদ্দিনই বটে।

সে আমার মুখের দিকে এক মুহূর্ত চাহিয়া থাকিয়া ভীষ্ম কর্ণে বলিয়া উঠিল, আমাকে চিনিতে পারিল কিনা জানি না, 'তুমি কেমন ছোট লোক হে? বলে দিলুম দেখা হবে না, তবুও এসেছ কেন? চাকর ডাকতে না হয়, ত মানে মানে বেরিয়ে যাও।' যারা কাছে বসিয়াছিল একত্রে বলিয়া উঠিল, 'একেবারে ছোট ———, একেবারে ছোট ———'। আমার মরিয়া যাইতে ইচ্ছা হইল। বড়ই দুঃখ হইল যে অমন সুন্দর চেহারা একেবারে কাল ছাইয়ের মত হইয়া গিয়াছে, আর মধুর চরিত্র এত তিক্ত হইয়া গিয়াছে। আমার চীৎকার করিয়া বলিতে ইচ্ছা হইতেছিল, 'ওগো, তোমার সঙ্গেই যে আমার সব চেয়ে বেশী খাতির ছিল।' কিন্তু একটি কথাও কণ্ঠ দিয়া বাহির হইল না। আস্তে আস্তে বাহির হইয়া নীচে আসিলাম। বম্ বম্ করিয়া বৃষ্টি পড়িতেছিল। এমনি এক বৃষ্টির দিনেই তার সঙ্গে বন্ধুত্বের সূত্রপাত হয় মনে পড়িয়া গেল এবং তেমনি এক বৃষ্টির দিনেই এতদিনের সেই সূত্র আজ ছিন্ন হইয়া গেল। সমস্তই বিষাক্ত মনে হইতেছিল, ঐ বৃষ্টির মধ্যেই ছুটিয়া চলিয়া আসিলাম।

মহম্মদ গোলাম ছোবহান।

অর্থনীতির এক দিক ।

মোটামুটি বলা যায় সপ্তদশ শতাব্দীতেই অর্থনীতি শাস্ত্রের জন্ম হয়। অর্থনীতি যে মানুষের জীবনের একটা সারাংশ নিয়া ক্রিয়া করে, ইহা যে সভ্যতার একটা বস্তুতাত্ত্বিক বিশ্লেষণ করে ইত্যাদি ব্যাপার নিয়া সম্প্রতি খুবই নাড়াচাড়া হইতেছে। অর্থনীতি মানুষের বৈচিত্রময় কাষাপ্রণালী, দৈনন্দিন জীবনের চিরপরিবর্তনশীল ভাবভঙ্গী অতি সূক্ষ্মভাবে পর্যবেক্ষণ করে। “Materealist conception of history” এই নূতন মতবাদ আজ নূতন করিয়া মানুষের বিচার শক্তিকে সজোরে আঘাত করিয়াছে। অর্থনৈতিক ব্যাপার ও জটিল সমস্যার সমাধানের উপরই ইতিহাসের ভিত্তি অনেক দিন স্থাপিত। জাগতিক সভ্যতার ত্তিকে একটা খুব impetus দিতে পারিয়াছে নূতন রকমের অর্থনৈতিক সমস্যা। ধর্মসংক্রান্ত সমস্যাও যে মানুষকে কম নাড়া দিয়াছে এমন নয়। কিন্তু জীবনকে নানাদিক দিয়া আলোড়িত করিয়াছে এই অর্থনৈতিক সমস্যা। ধন-সম্পদ চিরকালই মানুষকে অনেকখানি সাহায্য করিয়াছে। প্রকৃতি যেইখানে মানুষকে প্রচুর সুযোগ দান করিয়াছে সেইখানেই মানুষ স্বচ্ছন্দে ও নিশ্চিন্ত ভাবে জীবন যাপন করিতে পারিয়াছে। সুজলা, সুফলা, শস্যশ্যামলা প্রকৃতির কোলেই পৃথিবীর প্রাচীনতম সভ্যতা লালিত পালিত হইয়াছে। প্রাণরক্ষার উপযোগী যথেষ্ট মাল-মশলা যেখানে পাওয়া যায় সেখানেই মানুষের চিন্তাশক্তি দ্রুত বৃদ্ধি লাভ করিয়াছে। ইতিহাসের পৃষ্ঠায় সভ্যতার কাহিনীই লিপিবদ্ধ আছে। আর এই ইতিহাসকে গঠিত করিয়া তুলিয়াছে মূলতঃ অর্থনৈতিক ব্যাপার।

অর্থনীতি মানুষের জীবনকে অনেকখানি সুনিয়ন্ত্রিত ও পরিচালিত করিতে পারে। এই জীবন নিজেই যে একটা অতি বড় সমস্যা একথা অর্থনীতিবিদ স্বীকার করে। বহুরূপী সমস্যার সমাধানকল্পে অর্থনীতি নানা ভাবে সাহায্য করে। ইহা মানবজীবনকে পূর্ণাঙ্গভাবে বিকশিত করিয়া তোলে। মানুষ কিছুতেই আত্ম-সর্বস্ব জীবনে পরিণত হইতে পারে না। স্বভাবতঃ সে অশ্রের সহযোগিতা ও সহানুভূতি কামনা করে। মানুষ কেবল নিজের কথাই ভাবে ইহা বলিতে গেলে তার উপর খুবই অবিচার করা হয়। তার আত্মোন্নতির চরম ও পরম উদ্দেশ্য হইল সামাজিক জীবনকে সুন্দর ও রমণীয় করিয়া তোলা। ব্যক্তিগত উন্নতির উপরই সমষ্টিগত উন্নতি অনেকখানি নির্ভর করে। সামাজিক জীবনকে কি ভাবে সরস, সজীব, স্থিতিস্থাপক ও মধুর করা যায় অর্থনীতি সে পথও নির্দেশ করিয়া দেয়। “It necessarily involves the scientific examination of the structure and organisation of the community or communities in question; their history, their customs, laws and institutions; and the relations between their members; in so far as they affect or are affected by this department of their activity.” (Encyclopaedia Britannica)

তাহা হইলে দেখা যায় অর্থনীতি সামাজিক জীবনের উপর কতদূর প্রভাব বিস্তার করিতে পারে। “Economy is the art of making the most of life” (Bernard shaw) এর মধ্যে কতটুকু সত্য নিহিত আছে ভাবিয়া দেখিবার বিষয় বটে। জীবনকে পূর্ণতা-প্রাপ্তির দিকে অর্থনীতি কতটুকু অগ্রসর করিয়া দিতে পারে, ইহাকে সম্পন্ন ও ত্রীমান করিয়া তুলিতে অর্থনীতি কতটুকু সাহায্য করিতে পারে তাহা ভাবিয়া দেখিবার উপযুক্ত সময় আসিয়াছে। দারিদ্র্য যে মহাপাপ একথা আর নূতন করিয়া বলিতে হইবে না। ইহার সত্যতা যখন আমরা খুব ধীরভাবে উপলব্ধি করিবার চেষ্টা করি ও দারিদ্র্যকে প্রাণের সহিত যুগা করিতে শিখি তখন আমরা বুঝিতে পারি অর্থনীতি প্রকৃত প্রস্তাবে আমাদের কি করিতে বলে। দুনিয়ার যত বিরোধ সবার মূলেই বিকট অর্থনৈতিক সমস্যা মাথা উঠু করিয়া দাঁড়াইয়া রহিয়াছে। রাজনৈতিক ব্যাপারই বলি আর যাই বলি, পৃথিবীর বর্তমান অশান্তির মূলে রহিয়াছে একটা বিরাট একক অর্থসমস্যা। দুনিয়ার সর্বত্রই আজ সামাজিক সমস্যার মধ্যে একটা ঐক্য রহিয়াছে। প্রত্যেক দেশেই প্রায় একরূপ সমস্যা সমাজের অস্তিত্বকে বিপদাপন্ন করিয়া তুলিয়াছে। কারণ অনুসন্ধান করিতে গেলে দেখা যায় সব রোগের প্রতিকার প্রায় একই রূপ ঔষধ প্রয়োগে করা যায়। জগতের অর্থনৈতিক স্বার্থ দিন দিন একমুণী হইতে চলিয়াছে। আন্তর্জাতিক সংঘ ক্রমেই দৃঢ় হইতে দৃঢ়তর হইতে চলিয়াছে। এক জাতি অশ্রু জাতিকে exploit করিবার দুহু প্রবৃত্তি যেন ক্রমেই দমন করিবার প্রয়াস পাইতেছে। চালবাজী না করিয়া যাহাতে একটা Universal Economic Federation এর আদর্শে পৌঁছানো যায় তার জন্তই যেন বর্তমান জগতের চিন্তাশীল জাতিসমূহ আয়োজন আরম্ভ করিয়াছে। এরূপ আশা করা বোধ হয় অশ্রু হইবে না যে অদূর ভবিষ্যতে হয়ত অর্থনীতির ভিতর দিয়া একটা আন্তর্জাতিক মহাসম্মিলনের উদ্ভব সম্ভব হইবে। সব দেশেই আজ নিজেদের আর্থিক ভিত্তি সুদৃঢ় করিবার জন্ত হৈ চৈ পড়িয়া গিয়াছে। Politics এর ক্ষেত্রে এক জাতির সঙ্গে অশ্রু জাতির একটু দূর সংঘর্ষ। International Politics যে কোন দিন জগতে শান্তি আনয়ন করিতে পারিবে এরূপ মনে হয় না। Economics এর ক্ষেত্রে কিন্তু সে সব বিরোধ নাই। প্রত্যেক দেশ ও জাতিই নিজেদের অর্থনৈতিক স্বার্থ বজায় রাখিবার জন্ত অশ্রু দেশ বা জাতির মুখাপেক্ষী হইয়া আছে। জাতি সমূহের মধ্যে সহযোগিতা জগতের আর্থিক স্বচ্ছলতা অনেকখানি বৃদ্ধি করিবে। অর্থনৈতিক সমস্যা পরস্পরের মধ্যে মিলনের পথ খুঁই প্রশস্ত করিয়া দেয়। মনে হয় ব্যক্তিগত অর্থনৈতিক স্বার্থ সংরক্ষণের জন্তই ব্যবসায় বাণিজ্য ক্ষেত্রে আন্তর্জাতিক মিলনের প্রয়োজনীয়তা আরও স্পষ্ট ভাবে অনুভূত হইবে। “The love of Economy is the root of all virtues.” (Bernard shaw) অর্থনৈতিক বিষয়ে যাহারা

চিন্তা করে তাহারা মানুষের বৃহত্তম মঙ্গলের কথাই মনে মনে পোষণ করে। মানুষ কি ভাবে জীবনে একটু স্বাচ্ছন্দ্যের আশ্বাদ পায়, কি ভাবে তার অল্প সমস্তার সমাধান সহজ হয় ইত্যাদি শুভ সংবাদ যে তাহাকে দিতে পারে তাহার মূল্য একজন নীচ দার্শনিক তত্ত্বের মীমাংসাকারী অপেক্ষা কোন অংশে কম নয়। মানব জীবনের বহির্ভাগেই প্রথমতঃ আমাদের দৃষ্টি পড়ে। ইহাকে সুসজ্জিত করিতে পারিলে অন্তর্দেশ সংস্কার করিবার পথ খুবই সুগম হইয়া উঠে। ক্ষুধার্তের নিকট ধর্ম্মালোচনার কোন মূল্য আছে কি ?

অর্থনীতি এক হিসাবে বিজ্ঞান। যে হিসাবে আমরা অগ্ণাত বিজ্ঞানালোচনাকে সত্যের বিশ্লেষণ ধরিয়া নিয়া সাহিত্যের গণ্ডীভূত করিতে চাই—এস্থলেও তাহা অতি সহজেই করা যায়। সাহিত্য মাত্রই কাজের কথা বলে। জীবনের হর্ষ, বিষাদ, শোক, আনন্দ ইত্যাদির প্রতিধ্বনিই এই সাহিত্য। অর্থনীতিতে আমরা হীন, বঞ্চিত জীবনের প্রতিধ্বনি শুনিতে পাই। Bolshevism, Socialism, Communism, ইত্যাদি আন্দোলন আর্ন্ত, বঞ্চিত, অবজ্ঞাত জনসমাজের ব্যথার করুণ কাহিনী সর্বসম্মুখে প্রচার করিয়া বেড়ায়। কি ভাবে সমাজের নিম্নস্তরের স্পন্দনহীন জীবনকে জগতের অশেষ মঙ্গলোৎস করা যায়, কি ভাবে তাহাদিগকে সমাজের কাজে লাগানো যায় ইত্যাদি বিষয় নির্দেশ করিয়া দিবে অর্থনৈতিক সাহিত্য। এখানে থাঁটি সাহিত্যের জন্ম কত বড় উপাদান ও বহুমূল্য সম্পদ নিহিত আছে। আমাদের সাহিত্যকে অর্থনীতি একটা নূতন রূপ দিতে পারে। অর্থনীতি যে সাহিত্য গড়িয়া তুলিবে তাহা জীবনের বিষাদের গানই গাহিবে। প্রবল দুঃখবাদই এ সাহিত্যের মূলমন্ত্র হইবে। আশার বাণীও যে তথায় না থাকিবে এমন নয়। একদল চিরসুখী, অগ্নিদল চিরনির্ধ্যাতিত—অর্থনৈতিক এই যে বৈষম্য এর কোন সমাধান হইতে পারে কিনা তারই মীমাংসা এ সাহিত্য করিতে চেষ্টা করিবে।

আনোয়ার হোসেন ।

“মা”

আজ ছয় বৎসর তাদের বিয়ে হয়েছে। তারা দুজনাই দুজনকে ভালবাসে। একটা মোহময় স্বপ্নের ভেতর দিয়ে তাদের দিনগুলো কাটছিল। এ কয়বৎসরের মধ্যে একটা দিনের জন্তেও তারা কেউ কারো কাছ ছাড়া হয়নি। আজ তিন বৎসর হইল তাদের সর্বপ্রথম স্নেহের পুস্তলি ডল ঘরে এসেছে।

* * * * *

এ সংসারে নাকি সুখ কারোই একচেটিয়া নয়, তাই বোধ হয় তাদের দেশ আক্রমণ করলে বৈদেশিক শত্রু, আর গেথাইরিণকে যেতে হ'ল যুদ্ধে—স্বাধীন দেশের লোক কিনা!

* * * * *

আত্মিয়েরা গেথাইরিণের মৃতদেহ কাকিনে আবৃত করে নিয়ে এল তাদের ক্ষুদ্র কুটীরে।

হেলেনা একটুকুও কাঁদলেনা, শুধু মৃত স্বামীর পদতলে কাঠ হ'য়ে বসে রইল। এদেখে তার আত্মিয়েরা ভয় পেয়ে গেল—তারা বলতে লাগল—‘হেলেনা, তুমি কাঁদো—তুমি কাঁদো, নইলে বাঁচবে না!’ এর জবাবে সে শুধু সক্রিয় উদাস দৃষ্টি নিয়ে তার ডাগর চোখ দুটা মেলে চাইত—তার অর্থ বোধহয় এই যে “আমার আর বেঁচে কি হবে!”

তার আত্মিয়েরা কিংকর্তব্যবিমূঢ় হ'য়ে পড়ল। এমন সময় এক বৃদ্ধা আত্মিয়া ডলকে এনে হেলেনার কোলের উপর ছেড়ে দিলে। হেলেনা ঝলকে বুকে চেপে ধরে ডুক্রে কেঁদে উঠল—“বাছা, তোর জন্তে আমার বাঁচতে হবে—হাঁ আমার বাঁচতেই হবে।”

শ্রীমাখনলাল কর চৌধুরী।



পোয়পুত্র

ভবলীলা হায় সমাপ্ত প্রায়
ডাকাডাকি করে আশী

শিখিল হ'য়েছে দেহের চর্ম
বিদায় দিয়েছে গৃহের কর্ম
ঋণিক শ্রমেতে গলদঘর্ম
দেহ-পিঞ্জরবাসী ।

চিরদিন তরে সকল দম্ব
লয়েছে বিদায়, করিয়া অস্ত
আপনার কাজ এ পর্য্যন্ত
দৃষ্টিশক্তি সহ ।

দীর্ঘ এ'কাল নিঃসন্তানে
কেটেছে দৌহার ভগ্ন পরাণে
এ'যাতনা আরো জীবনাবসানে
হ'য়েছে দুর্কিসহ ।

বসিয়া নিকটে প্রৌঢ়া গৃহিণী
বীণা নিম্নিত মধুর ভাষিনী
কহিলা গরবে স্বামী গরবিনী
মরমস্তদ ভাষে,—

“ওগো আমরা যে নিঃসন্তান,
নিষ্ফল হয় জীবনাভিযান,
রেখেছি সাজায়ে এ' ছার পরাণ
এ' ভবে কিসের আশে” ?

বলিতে বলিতে হইল রুদ্ধ
কণ্ঠের স্বর, নিমেষ মধ্য
কাতর করুণ নয়ন শুদ্ধ
ভরি' উঠে আঁখি জল ;

উখলি' উঠিল শোকের সিন্ধু,—
ছাইল বিষাদে বদন-ইন্দু ;
ঝরিয়া অশ্রু ছ'এক বিন্দু
চুম্বিল ভূমিতল ।

হেরিয়া আমার মুগ্ধ পরাণ
করুণা সলিলে হ'ল ভাসমান,
বস্ত্রাঙ্কলে মুছা'য়ে নয়ান
কহিলাম মধু মুখে,

“কভু নহে ইহা মানব-সাধ্য
দিয়াছেন যাহা বিধি আরাধ্য
লইয়া তাহাই হইয়া বাধ্য
ধাকিতে হইবে স্নেহে ।

বিধির হাতের স্নেহময় দান
লভিতে যখন পারেনি পরাণ,
সহিব নীরবে; আছে ভগবান
জীবনে সকল কাজে ।”

“মিছে বোধ আর মানেনা পরাণ” ।
— উত্তর হ'ল বস্ত্র সমান,
বুঝিবা প্রলয় বাধে ভগবান,
এখন নিমেষ মাঝে ।

কহিলা ভামিনী স্বস্বর ঢেলে,—
“বুদ্ধি তোমার বড়ই সেকেলে,
রহমতপুরে বন্দুদের ছেলে
পোয়পুত্র আনো ।

নতুবা মৃত্যু-অস্ত্রে দৌহার,
সব সম্পদ হবে ছারখার,
বংশের বাতি রহিবেনা আর,
ইহাও কি নাহি জানো” ?

কহিলাম “ছি ছি একি কহ ছাই ?
মোদের দয়ার আর কেহ নাই ?
বন্দের ছেলে কি আপন ? তাই
কিছুই বুঝিতে নারি ।

হের চারিধারে কত দুখী-দীন,
অনাথ আতুর আশ্রয়হীন
তাহাদের তরে আয়োজন ক্ষীণ
করেছি জীবন ভরি ।”

ক্রুদ্ধা ফণিনী কহিলা শুনিয়া
কর-পল্লব কপোলে ছানিয়া,
“নিবে দু’জনাতে নরকে টানিয়া
শ্রাদ্ধ না হয় যদি ।

এত ঘটী করে ও গাঁয়েতে তাই,
পোষ্য নিয়েছে বিরাজ গোঁসাই ;
অপুত্রকের নরকেতে ঠাঁই,
সর্ববশান্ত্রে বিধি ।”

কহিলাম আমি নম্র বচনে
নচেৎ কে জানে কি ঘটে সেক্ষণে —
“পরের পুত্র না আনি ভবনে
যা’ আছে করিব দান ।

তাহাদের শুভ আশীষ-উক্তি
নরক হইতে আনিবে মুক্তি,
এ’ কথা কহিনু পূর্ণ যুক্তি,
করি’ দেখ অনুমান ।

বৃথা তব এই অলৌক স্বপন,
পরের ছেলে সে হয় না আপন,
তার চেয়ে এই বিস্তব ভবন
দীনহীনে কর দান ।”

সরোষে মানিনী কহিলা “এ সবে
প্রবোধ আমার কভু নাহি হবে,
পোষ্যপুত্র লহ, নয় তবে
ত্যজিব এ ছার প্রাণ ।

বন্দের ছেলে প্রিয়দর্শন
মন্দের বলে করিব আপন,
বসন ভূষণে করিলে যতন
ভুলিবে আপন মায় ।”

কহিনু সতয়ে, “মার সন্তান
কেমনে করিবে অশ্বরে দান ?”—
বৃথা এ প্রয়াস, অশ্রুর বান
যুক্তি ভাসায়, যায় ।

* * * *
পরের পুত্র হইয়া আপন
সন্তান-সাধ করিবে পূরণ,
করিছে তাহার মহা আয়োজন
গৃহিণী আপনি সাজি’,

তাম্বুল-রাগ রঞ্জিতাধর—
চকিতা বিজলী অম্বুদোপর ।
বেণী-বন্ধনে ভয়ে থর থর
বিরল অলকরাজি,

কণ্ঠে উজল-হিরক-কিরণ,
শিখিল অঙ্গে রত্নাভরণ,
অপরের ছেলে করিতে আপন

হ ল বহু সাজ সজ্জা ।

গোপনে থাকিয়া হাসে ভগবান,
কোন পিতামাতা কঠিন-পরাণ
সস্তানে করে অন্তরে দান
নাহি কিরে যুগা লজ্জা ?

কিসের বাণ্ড গৃহে মোর আজ ?
কেন উৎসব মঙ্গল-কাজ ?
কিসের লাগিয়া হেন মহা সাজ—
ভাবিতে কাঁদিল প্রাণ ।

বিধবা রমণী বস্তুর গৃহিণী,
দীনা দরিদ্রা চিরঅনাথিনী,
অর্থের মোহে অভাগী জননী
শিশুরে করেছে দান ।

দাঁড়াইয়া আজ অঙ্গন-কোণে,
জনমের মত শেষ দরশনে,
বক্ষে ধরিয়া জীবন-রতনে
চেয়ে আছে মুখপানে,

উছল অশ্রু-সলিলে ভাসিয়া
ধরে বারবার বক্ষে চাপিয়া,
শিশু আধ আধ মা বলি' ডাকিয়া
তুষিছে আকুল প্রাণে ।

হেরি নিদারুণ দৃশ্য এ হেন
অন্তর মোর টুটে যায় যেন,—
মানব হইয়া নির্দয় কেন
বনের পশুর মত ?

অনাথার কোল করিয়া রিক্ত
হুখিনীর আঁখি করিয়া সিক্ত

এ নিষ্ঠুর পাপে হইয়া লিপ্ত
নরক ভুগিব কত ?
কহিলাম ডাকি থেমে যা'ক সব
আনন্দ-গান হাসি-কলরব
প্রাণ লয়ে খেলা, হীন উৎসব ;
মানুষের নহে কাজ ;

*পূজা-আয়োজন ইউক বন্ধ,
কেলে দাও দীপ অগুরু-গন্ধ,
দীনের পূজায় পরমানন্দ
লভিব ভুবন মাঝ ।

সহসা আমার এ আদেশ শুন'
শব্দ ঘণ্টা খামিল অমনি,
মূর্চ্ছিতা ভূমে পড়িল গৃহিণী
পূজার আসন তলে ।

অঙ্গন কোণে শিশুর জননী
চাহে বিস্ময়ে চকিতা হরিণী
খেলিল পরাণে আগার দামিনী
নয়ন ভরিল জলে ।

বাহু বন্ধনে শিশুরে বাঁধিয়া
অসহায়া নারী উঠিল কাঁদিয়া
কহিনু তাহারে ধীরে প্রবোধিয়া
'ফিরে যাও তব গেহে,

সস্তান তব রহিবে তোমার
তবু হেথা তার রবে অধিকার
পালিব নিঃস্ব জনে অনিবার
সস্তান-সম স্নেহে ।'

শ্রীমদভ্যুতোর ভট্টাচার্য্য ।

“গল্পগুচ্ছ”

তুলির আঁচড়ে ভিতরের নিভাস্ত সত্য নিভাস্ত গুহ্য মানুষটাকে সজীব ক’রে সুন্দর করে স্পর্ষ করে ফুটিয়ে তুলবার যে শক্তি তা শিল্পীর একান্ত নিজস্ব হলেও তার উপর পারিপার্শ্বিক আবহাওয়ার খুব বড় বুকজোড়া অধিকার (Influence) আছে। শিল্পীর ভিতরে একটা শক্তি নিহিত আছে—যা’ঈশ্বরপ্রদত্ত এবং স্বাভাবিক স্তূতরাং তার নিজস্ব—যে শক্তিবলে সে দুটো তুলির আঁচড়কে একত্র ক’রে মিলিয়ে মিশিয়ে নিয়ে একটা কাঠাম (Foundation) খাড়া করতে পারে। কিন্তু সেই কাঠামের উপর প্রতিমা গড়ার শক্তি এবং সেই প্রতিমার উপর রঙ ফলানোর শক্তি সে পেয়ে থাকে—বিশ্ব প্রকৃতির নিকট হতে—তার পারিপার্শ্বিক আবহাওয়ার তরফ হ’তে। ইন্ধনের নিজের মধ্যে আগুন প্রচ্ছন্ন আছে বলেই বাহিরের আগুনের স্পর্শেই সে জ্বলে উঠে; পাথরের উপর বাহির হতে আগুন রাখলে সে ক্ষণকালের জন্ত তে’তে উঠে মাত্র—জ্বলে না বা জলতে পারে না। এই ভিতরের আগুনটা নেহাৎ স্বাভাবিক হলেও তাকে একান্ত নিছকরূপে সত্য করে তোলে—সাহিত্য। যে বিপুল শক্তি বালক রবীন্দ্রনাথের বালকহৃদয়ের মাঝে গুমরে গুমরে মর্শ্বিল তাকে একান্ত নিছক-রূপে সত্যের আলোতে ফুটিয়া তুলেছে আমাদের এই সাহিত্য—এবং বাইরের থেকে তার ভিতরের আগুনের ইন্ধন যুগিয়েছে—বাংলা দেশের আবহাওয়া এবং ঠাকুর পরিবারের ছয় রকম বাধা ও ছত্রিশ রকম নিষেধের বন্ধন গুলি। সৃষ্টি-মাঝে ভগবানের অপূর্ব সৃষ্টি মানবের নেহাৎ সৃষ্টিছাড়া নিরীহ হাবভাব, জুজুর ভয়, ভূতের ভয় প্রভৃতি হরেক রকম কাল্পনিক ভয়ের বীভৎসতা, মৃত্যুর ওপারের অজানা দেশটা সম্বন্ধে হরেক রকমের ধ্যান-ধারণা, ভূত-প্রেত সম্বন্ধে ঠা’কুমাদের বিচিত্র কল্পনা বালক রবীন্দ্রনাথের হৃদয়ে যে কতটুকু দাগ কেটেছিল তা নিছক স্বরূপ ফুটে উঠেছে যৌবনে তার কলমের মুখে—গল্পগুচ্ছের ছোট ছোট গল্পগুলিতে।

গল্পগুচ্ছের গল্পগুলিতে অনেকে অনেক রকম রসের অবতারণা করেন কিন্তু ছেলেবেলা যখন গল্পগুচ্ছ পড়ি তখন হাত্তরসের অন্তরালে আর একটা রস আমার মনের মাঝে উঁকি খুকি মারত—সে হয়েছে বিস্ময় রস। কোন্ কোন্ গল্প তখন পড়েছি তা মনে নেই কিন্তু এই বিস্ময় রসের প্রকোপে মনের মধ্যে কত হরেক রকমের ছবি গ’ড়ে উঠে কত অসম্ভবকে সম্ভব ক’রে তুলতে সাহায্য করেছিল—সে সব খণ্ড খণ্ড ছবিগুলি নানা গল্পের কাঠামো হাত সারে এসে স্বতন্ত্র চিত্রশালার মত এখনো মনের অনেকটা জায়গা জুড়ে আছে। এই বিস্ময়-রসের অন্তরালে কোন কোন গল্পে কুড়িয়ে পেতুম বীভৎস রস। ভৌতিক বিস্ময়ের ভীতিতে বৃকের রক্ত যতই জমতে থাকত ততই সেই রহস্যময় অন্ধকাররাজ্যের ভিতর উঁকি খুকি

মেয়ে সন্ধান করবার আকাঙ্ক্ষা আরও বেড়ে চলত—ছবিগুলি আরো দৃঢ়ভাবে মনের মধ্যে শিকড় গেড়ে বসত ।

মনে পড়ে “জীবিত না মৃত”এর কাদম্বিনীর সেই ছবি । ঘনঘটাচ্ছন্ন তামসী রজনীতে শ্মশানের বীভৎসতার মধ্যে, ভূতপ্রেতের আনাগোনার মাঝে কাদম্বিনীর অবস্থাটা ভাবিতে আমার শিশুমনটা আতঙ্কে অস্থির হয়ে উঠত । রাত্রে এঘর হতে ওঘরে যাবার সময় সেই চিত্রটি আমার মনের মাঝে বল্কা মেয়ে আমাকে এমন ভীতিবিহ্বল করে ফেলত যে আমি যেন মানসেন্দ্রে অন্ধকারে জোনাকীর আলোতে ভূত প্রেতের আনাগোনা দেখতে পেতুম ; স্মৃতরাং একাকী অন্ধকারে চলাফেরা করা আমার পক্ষে অসম্ভব হয়ে উঠত । কোথা হতে নাজানি “শ্রীকান্তের” শ্মশানের ছবিটা ও ঠিক এসময় যুগপৎ মনের মাঝে ভেসে উঠত । ভয়ে আমার বুকের রক্ত বরফ হয়ে যাবার যোগাড় হত । ঘরের মাঝেই যেন শ্মশানের বীভৎসতা দেখতে পেতুম ।

এ হেন শ্মশানের বীভৎসতার মাঝে কাদম্বিনী জেগে উঠে দেখল সে আপনার ঘরের নাই, রোগশয্যার কথা মনে করে সে বুঝতে পারল সে বেঁচেই আছে । তা’ কাদম্বিনী কেমন করে জানল বা বুঝতে পারল যে সে মরেনি,—এ ভাবনা আমার শিশু মনকে মহা সমস্যায় ফেলেছিল । মৃত্যু যে কি জিনিষ তা বোঝা একেত দুর্লভ তা’তে আবার মানুষ ম’রে যে কেমন করে আপনার মৃত্যুর সত্যতা উপলব্ধি করতে পারে তা’কিছুতেই আমার মাথায় ঢুকছিল না । তাই কাদম্বিনীর মত আমার মনও সংশয় দোলায় দুলত । শেষে কাদম্বিনী পুকুরে ঝাঁপ দিয়ে মরে প্রমাণ করল যে সে প্রথমবার মরে নি’ । বাইরের লোক বুঝল বটে যে কাদম্বিনী প্রথমবার ম’রেছিল না কিন্তু কাদম্বিনী নিজেকে কি ক’রে বুঝল, সেইটাই রয়ে গেল আমার কাছে পরম সমস্যা ।

মৃত্যু জনিষটা খুব আশ্চর্য্য, খুব ভয়ঙ্কর হলেও তা’ খুব অভ্রান্তভাবে খুব নিছক ভাবে সত্য । মৃত্যুর পরে লোক ভূত প্রেত হয় এবং ইচ্ছামত যেখানে সেখানে নির্ভয়ে ভ্রমণ করতে পারে স্মৃতরাং মৃত্যুর পরে মানুষ একটা নূতন বলে বলীয়ান হয়ে ইচ্ছামত চলাফেরা করতে পারে । এই যদি হয় তবে মৃত্যুটা এত ভয়ঙ্কর কেন এবং ভূত প্রেত হওয়াটাই বা এত বীভৎস কেন এ আমার কাছে ভারী বিসদৃশ ঠেকত । মৃত্যুটা একটা পরিবর্তন, খুব বিস্ত্রী ; খুব অদ্ভুত পরিবর্তন সন্দেহ নাই । বিস্ত্রী ভাবতুম এজন্ম যে এক মুহূর্তের পরিবর্তনের ফলে মানুষ স্নেহ দয়া মায়া সব বিসর্জন দেয় ; তা’ না হলে “নিশীথে” নিরীহ দক্ষিণারঞ্জনের উপর এ অত্যাচার কেন ? এক মুহূর্তের পরিবর্তনের ফলে সে মানবোচিত সমস্ত সহানুভূতির সীমা এড়িয়ে বেচারি দক্ষিণার মশারির পাশে নীর্ণ আঙ্গুল বাড়িয়ে “ওকে ওকে গো” বলে তীব্রভাবে ঘুরে বেড়াচ্ছে । রাত্রে মায়ের

বুকে শুয়ে দক্ষিণার মত আমি ও ঘেন মশারির চারিধারে কাহার আনাগোনা শুনতে পেতুম এবং ভয়ে মায়ের বুকে আরও নিবিড়ভাবে আশ্রয় নিতুম। কিন্তু আমার মন কিছুতেই প্রবোধ মান্তনা কারণ ভূতেরাও এক সময় মানুষ ছিল তো তারা কেমন করে এত নির্দ্বন্দ্ব হতে পারে।

মৃত্যুটা দ্রুত সত্য কিন্তু মরতে মানুষ চায় না। এর কারণ মৃত্যু সম্বন্ধে এত অনুসন্ধান করেও মানুষ এ যাবত কোন সমাধানের মুখে আসতে পারে নি'। এত গুলি চিন্তা; তরসা স্নেহ দুঃখ আশা-নৈরাশ-বুদ্ধি-বিবেচনাতে বোকাই করা মানুষের মানস তরীটী মৃত্যু সমুদ্রের অতল তলে তলিয়ে গেলেও যে কিরূপে তাঁর অস্তিত্ব একেবারে লুপ্ত হ'তে পারে তা' মানুষের মস্তিষ্কে ঢোকে না এবং এই মনটার বিনাশ মানুষ পছন্দ করে না স্মরণঃ মৃত্যুতে আত্মার বিনাশ মানুষ স্বীকার করেনা বা করতে চায় না। জীবনে মানুষ ধন, জন, যৌবন, হিংসা, প্রেম প্রভৃতি অনেক জটিল জালে জড়ায়। এই পার্থিব জটিল জালই তার কাছে শাস্ত হ'য়ে উঠে। সে জানে এই জাল ছিন্ন ক'রে সমস্ত অতৃপ্ত আকাঙ্ক্ষা বুকে নিয়ে তাকে অনন্তের যাত্রী হ'তে হবে। সমস্ত জীবন দিয়ে তিল তিল করে মানুষ যা' গড়ল যা'বেষ্টন করে আঁকড়িয়ে ধরে সে প্রত্যেকটা মুহূর্ত বাঁচল তা ফেলে সে কোথায় যায়? যদি যায় তবে কি অতৃপ্তির নিশ্বাস ফেলে সে অভীষ্ট বস্তুর পাছে ঘুরে বেড়ায় না বা তা পেতে চায় না? অজানা পরলোকে কেমন করে সে শাস্তি পায়। মৃত্যুর সঙ্গে সবই কি নিঃশেষে মিলিয়ে যায় অনেক দিন যাবত এ ভাবনা ও জিজ্ঞাসা মানুষের মনে জেগেছে স্মরণঃ আত্মার বিনাশ মানুষ স্বীকার করেনা। তাই বোধ হয়—গীতায় শ্রীকৃষ্ণের উক্তি—“আত্মা অবিনশ্বর”—আমাদের বিজ্ঞান ও ঠিক এই কথাই অগ্ৰ ছন্দে বলে “পদার্থের বিনাশ নাই” (matter is indestructible)। আত্মার অবিনশ্বরত্বের সম্বন্ধে আধ্যাত্মিক অনেক যুক্তি থাকতে পারে কিন্তু ছেলেবেলায় প্রথম যখন গীতা পড়ি তখন আমি অবিনশ্বরত্বের এই রকম অর্থই করেছিলুম মনে পড়ে। জীবিত মানুষের এই দেহে কি পরদেহে বেঁচে থাকবার যে একটা তীব্র আকাঙ্ক্ষা তাঁরই সহিত আপনার ও পরের মৃত্যু সম্বন্ধে কৌতূহল ও বিস্ময় মিলিয়ে যে ভৌতিক বিস্ময়রসের সৃষ্টি হয়েছে মানুষ চিরকাল নানা কাহিনীর ভিতর দিয়ে নানা ছন্দে তাই প্রকাশ করে আসছে। প্রাচীনকালে তাই ছিল নিছক ভূতের গল্প। তার ভিতর বর্ণ ভঙ্গিমা বা রেখাবিহাসের বালাই মোটেই ছিল না। তার ভিতর শুধু ছিল একটা বিস্ময়কর বিভীষিকাময় রহস্যলোকের ছবি। মানুষের বিশ্বাস অবিশ্বাস, ভয়, বিস্ময়, সংস্কার প্রভৃতির বিশ্লেষণ মোটেই ছিল না। কিন্তু সাহিত্যের উন্নতির সঙ্গে সঙ্গে, মানুষের চিন্তা শক্তির, ভাববার ক্ষমতা এবং স্বকীয় চিন্তা ও অনুভূতির ধারাকে বিশ্লেষণ করে দেখবার ক্ষমতা বাড়বার সঙ্গে সঙ্গে এবং সাহিত্য বস্তুর ছাঁচটীর, কারিগরি মাপজোখ এবং গল্পের

কাঠামোর ভিতর এনে তার নিয়ম কানুন মেনে চলবার সঙ্গে সঙ্গে ভূতের গল্পের চেহারাই বিল্কুল বদলে গেছে। বিস্ময়কর পরলোকের কাহিনীকে মানুষ শুধু ভীতি ও বিস্ময়ের গভীর মাঝে বন্দী করে রাখেনি। তাকে অবলম্বন করে মানুষ আপনার কৌতূহল, সংশয়, বেদনা, অতৃপ্তি, ক্ষোভ বিস্ময়, জিজ্ঞাসা—সকল কিছুই প্রকাশ করছে; এবং বিচার বুদ্ধিও অধ্যাত্মবুদ্ধিকে স্বকীয় বিবেকের লাগামে টেনে এনেছে আবার সকল গুলিকে মিলিয়ে সাহিত্যসৃষ্টির একটা সমগ্র রূপ ও প্রকাশ করছে। ‘ঠানদি’র কাছে শোনা ভূতের গল্প হ’তে রবীন্দ্রনাথের ভূতের গল্পের এই প্রভেদ। ছোটকালে ঠাকুরার কাছে গল্প শুনেছি রাত্রে না জানি কারা এসে লোককে ঘুম থেকে ডেকে নিয়ে যায় এবং তন্দ্রাচ্ছন্ন অবস্থায় তাকে বিল ঝিলের মধ্যে নিয়ে মেরে ফেলে। ঠিক এইরকম ঘটনাই আমরা “মনিহারার” ফণিভূষণের সলিল-সমাধির মধ্যে পাই কিন্তু লেখক ঠিক এই ভাবে কথাটিকে প্রকাশ করতে চাইলেন না তা’ই লিখলেন জলে ডোবার আগে ফণিভূষণের তন্দ্রার ঘোর কেটে গেল। আবার পাছে এই ভৌতিক রহস্যটা পাঠকের কাছে সত্য বলে ভ্রম হয় তাই গল্পটিকে রহস্যের চরমসীমায় উন্নতী করে তাকে পরিহাসের ফুৎকারে উড়িয়ে দিলেন। ভৌতিক জগতের বিষয় অনুসন্ধান করে তিনি কোন সমাধানে এসে পৌঁছতে পারেন নি তাই তার গল্পের মধ্যে যেখানে সেখানে তার লেখনীর মুখে সংশয় ও অবিশ্বাসের সুর বেজেছে কিন্তু সে সুর কোথাও বেশুরে বেতালা হয়নি যা’তে গল্পের চন্দ্রপতন হতে পারে। হাস্ত, বিস্ময়, বীভৎস, সংশয় প্রভৃতি বিভিন্ন রসের আবর্তনে পড়ে, নিছক ভূতের গল্প ও বেশ রসাল ও সুন্দর হ’তে পারে রবীন্দ্রনাথের গল্পের ইহাই বিশেষত্ব।

“মনিহারার” পোড়া অভিশাপগ্রস্ত বাড়ীটিতে পা দিলেই পাঠকের মন রহস্যময় কৌতূহলে উদ্দীপ্ত হ’য়ে উঠে। তার পর আমাদের চিরপরিচিত সংসারে আনাগোনা—নায়কটি নব্যরঙ্গ—নায়িকা সুন্দরী, অলঙ্কারপিপাসু, সুগৃহিণী। মাণিকালিকা সাড়ী পরে, পাতা কাটে, বাজুবন্ধ পরে ঝুম্ ঝুম্ করে মল বাজিয়ে রান্নাঘরে রাজত্ব করে, ব্যঞ্জনে সুগ ঠিক দেয়—তাকে নিয়ে যে গল্প রচিত হবে তাতে স্বামীস্ত্রীর পারিবারিক সুখদুঃখের কাহিনী ভিন্ন আর কি থাকতে পারে; সেই ছন্দেই গল্প চলছিল বেশ—হঠাৎ সুর বদলে গেল। গহনা লুকোবার তাড়ায় মণি বাপের বাড়ী পালা’লে শূন্যগৃহে ফণিভূষণ যখন ফিরে এল তখন হঠাৎ পোড়া অভিশাপগ্রস্ত বাড়ীটার ছবি স্পষ্ট হয়ে ফু’টে উঠল। গভীর তামসী রাত্রি, রক্তহীন অন্ধকারে শ্রাবণের অশ্রান্ত বর্ষণের মাঝে নির্জন গৃহে ফণি বসিয়া—হরেক রকমের চিন্তা তার মাথার মাঝে কিলবিল কচ্ছে; তার পর বর্ষার অন্ধকারে রাতের পর রাত নদীর ঘাট হ’তে সুর করে

দেউড়ী ডিঙ্গিয়ে, অস্ত্রপুরের গোল সিড়ি ঘুরে, কঙ্কালময়ী সালঙ্কারা মনিমালিকার আসা যাওয়া—গভীর ভৌতিক রহস্যপূর্ণ, পড়তে গা'ছম্ ছম্ করে, বুকের রক্ত বরফ হ'য়ে যাবার যোগাড় হয়। ক্রমে রহস্য গভীর হ'তে গভীরতর হ'তে চলল—ভৌতিক বিস্ময় উগ্র হ'তে উগ্রতর হয়ে উঠল—অমনি লেখকের লেখনীর মুখে সংশয়ের সুর বেজে উঠল। স্বপ্ন যা ছিল তা সত্যের মুখোস প'রে উঠে দাঁড়াল আবার সত্য স্বপ্নের খোলস প'রে মস্তিষ্কের কিলিবিবির অস্তরালে গা'টাকা দিল। স্বপ্ন সত্য কি জাগরণ সত্য ফণিভূষণের কাছে তা'ই হল ভাববার বিষয়। স্বপ্ন জাগরণেব এই আবর্তনের মাঝে ফণিভূষণের নিশীথের অভিসার সুর হল। কঙ্কালের পিছু পিছু দেউড়ী ডিঙ্গিয়ে নদীর ঘাটে এসে ফণি জলে নামল, পরক্ষণেই তার সলিল-সমাধি হ'ল। কঙ্কালময়ী মনিমালিকার এ ডাক্কে যখন নিবিড়তম রহস্য, বিস্ময় ও ভীতির মুখোস পরিয়ে পাঠকের সামনে ধরা হয়েছে তা'পাছে পাঠকের কাছে সত্য বলে মনে হয় তা'ই লেখক ফণির সলিল-সমাধির পূর্বক্ষণেই বল্লেন “ফণিভূষণের তন্ত্রা টুটিয়া গেল...স্বপ্নের মধ্য হইতে মুহূর্ত-মাত্র জাগরণের প্রান্তে আসিয়া পরক্ষণেই অতলম্পর্শ সৃষ্টির মধ্যে নিমগ্ন হইয়া গেল” পাছে রসভঙ্গ হয় এজন্ত আগে একথা বলেননি' এবং শেষে ও বেণী জোর দেন নি' কিন্তু এই স্বপ্নলীলা এতখানি ভয়ঙ্কর করতে তাঁর প্রাণে বড় লাগল তাই তার ভয়ঙ্কর রূপটি দেখিয়ে পুরোপুরী আনন্দ পাবার পর হঠাৎ সদয় হয়ে তিনি গল্পটাকে পরিহাসের ফুৎকারে উড়িয়ে দিলেন। এতক্ষণ যে গল্প শুন্তে বসে, বসে বসে বিমুচ্ছিল সে হঠাৎ বলে উঠল “আমার নাম ফণিভূষণ আমার স্ত্রীর নাম নৃত্যকান্ধী”। গল্পের কাঠামোর ভিতর কোথাও যা' লাগল না, কারণ তা যতখানি মনস্তত্ত্ব চর্চা করবার ও ভয় বিস্ময় ভীতি জাগিয়ে ভয়ঙ্কর পরিণতি আনবার তা'এনেছে। লেখকের গল্পের উদ্দেশ্য পূর্ণ হয়েছে, তার পরেই পাঠকের বুকের বোকাটা হাল্কা করবার জন্ত সহাস্তে বল্লেন “এ হচ্ছে একটা আগাগোড়া পরিহাস”—এ যেন গাছের গোড়া কেটে প্রাণপণ করে আগায় জল ঢালা। মনের ঝাল মিটিয়ে গাল দেওয়া ও হ'ল আবার মানহানির মোকর্দমার হাত হ'তে ও নিকৃতি পাওয়া গেল। কি মজা!

‘ক্ষুধিত পাষণ’ গল্পটিতে রবীন্দ্রনাথ বিস্ময়রসকে গল্পের কাঠামোর গভীর ভিতর বন্দী করতে প্রয়াস পাননি। গল্পটি পড়ে মায়াপুরীর সম্বন্ধে ও তার অধিবাসিনী সন্দরীর সম্বন্ধে যে কী ঔৎসুক্য ও কৌতূহল জেগেছিল তা বলতে পারিনে। যার মুখ দিয়ে লেখক গল্পটি বলাচ্ছিলেন সেই লোকটা কৌতূহলকে চরম সীমায় উপনীত করে হঠাৎ একটা স্টেশনে নেমে যাওয়ায় অনতি-যৌবনক্রান্ত রসপিপাসু পাঠকের মন লেখকের প্রতি মোটেই প্রসন্ন হয় নি'। বিস্ময় রসের প্রাচুর্য ও ইহাতে খুবই। বিস্ময়ের চরম সোপানে পাঠককে তুলে দিয়ে লেখক ট্রেনে চড়ে পিঠটান দিলেন, কেবল মনটা একটু খুঁৎ খুঁৎ করছিল তাই যাবার বেলা বলে গেলেন “লোকটা আমাদিগকে বোকার মত দেখিয়া কৌতুক করিয়া ঠকাইয়া গেল——গল্পটা আগাগোড়া বানান।” গল্পটি

পড়ে যুগপৎ বিস্ময় ও কৌতূহলের আবর্তনে পড়ে মনটা হাঁকিয়ে উঠেছিল। গল্পটা পড়ে শেষ করেছিলুম অনেক রাত্রে। সে রাত্রে ঘুম হয়ে থাকলে কখন হয়েছিল মনে নেই।

গল্পগুচ্ছের নানা গল্পে নানারকম রস নানারকম ভঙ্গী নিয়ে দেখা দিয়েছে। পতন-অভ্যুদয়-বন্ধুর বিপদসঙ্কলপথে মানবহৃদয়ের বহু বিচিত্রগতিক, বহু চিন্তা, সমস্যা, সুখ-দুঃখ, হাসি-কান্নার বিভিন্ন স্তরকে তিনি তাহার রচনায় সুন্দররূপে ফুটিয়ে তুলেছেন। তার গল্পের ভিতর এমন একটা সৌন্দর্য্য, সুষমা ও সামঞ্জস্য আছে যা'তে সেগুলি আর্টের সৌকুমার্য্যে সরস ও সুন্দর হয়ে সাহিত্যের আগুণে পুজারীদিগের নিকট সমুচিত আদর পেয়ে আসছে। সাহিত্যের ছয় রকম নিয়ম ও ছত্রিশ রকম নিষেধের গণ্ডী ডিঙ্গিয়ে গল্পগুলি স্বাধীনভাবে, স্বতন্ত্র ভাবে, নূতন মূর্তিতে দেখা দিয়েছে। গোময়ের ভিতর হতে জন্ম নিয়েও পুষ্প যেমন করে আকাশের পানে তাকায়, তাহার গল্প গুলি ও সেইরূপ নানা ভঙ্গী ও নানা ছন্দের ঘটনার তরফ হ'তে বেরিয়ে এসে আর্টের সৌকুমার্য্যে সুন্দর, সরস ও সুবিচলিত হ'য়ে দেখা দিয়েছে। পক্ষে ও যেখানে যার জন্ম সেখানে সে পঙ্কজ হয়ে আকাশের পানেই তাকিয়েছে; কারণ আর্ট মাটি নয়, মাটিতে গড়া স্রষ্টার হাতের প্রতিমা। আর্ট রঙ নয় রঙের সংমিশ্রনে জাত তুলির আঁচড়ে আঁকা ছবি, সৌন্দর্য্য সৌকুমার্য্য সুসঙ্গতি ও সুবিচলিত হ'য়ে আর্টের জীবন, সুতরাং আর্ট সুন্দর, সুকুমার সুসঙ্গত, এবং নিশ্চল।

শ্রীবীবেশ চন্দ্র চক্রবর্তী

মাটির টান ।

[এক]

নিদাঘ-মার্গণ্ডের তীক্ষ্ণরশ্মি মস্তকে ধারণ করিয়া রহমান জমিদারবাড়ী হইতে গৃহে প্রত্যাবর্তন করিয়া দেখিল তাহার একমাত্র নবম বর্ষীয়া কন্যা আশ্‌মানী তাহারই অপেক্ষায় বসিয়া থাকিতে থাকিতে কখন দাওয়ায় শুইয়া ঘুমাইয়া পড়িয়াছে । অপ্রশস্ত আজিনার মধ্যস্থলে দাঁড়াইয়া কন্যার মুখপানে দৃষ্টিনিষ্কেপ করিতেই রহমানের দুই চক্ষু হইতে অবিশ্রান্ত অশ্রুধারা ঝরিতে লাগিল, নিমেষে তাহার দৃষ্টিশক্তি অশ্রুধারায় রুদ্ধ হইয়া গেল, বৃদ্ধ মলিন বস্ত্রাঙ্কলে চোখের জল মুছিয়া লইল । সমস্ত দিনের অনাহার, তদুপরি এই গ্রীষ্মের প্রখর সূর্য্যতাপ সহ্য করিয়া করিয়া সে অবসন্ন হইয়া পড়িয়াছিল । সমস্ত বাড়ীখানা যেন তাহার চারিদিকে ঘুরিতে লাগিল—হঠাৎ সে ধড়াসু করিয়া আজিনার মাঝখানে মাথায় হাত দিয়া বসিয়া পড়িল ।

ঘনীভূত নৈদাঘ নীরবতা রহমানের ক্ষুদ্র জীর্ণ হস্তশ্রী গৃহখানাকে যেন অভিভূত করিয়া ফেলিয়াছিল, আর তাহাই ভেদ করিয়া বাঁশঝোপের শীর্ষ হইতে বিল্লীদলের কর্কশ স্বরমুচ্ছনা উদ্ভিত হইয়া তাহার বিভীষিকা আরও বর্দ্ধিত করিতে লাগিল । রহমান প্রকৃতিস্থ হইয়া ক্ষীণ কণ্ঠে ডাকিল ‘আশ্‌মানী !’ তাহার কণ্ঠস্বর কণ্ঠেই লয় প্রাপ্ত হইল — গভীর নিদ্রাভিভূতা বালিকার কর্ণে তাহা প্রবিষ্ট হইল না ।

রহমান উঠিয়া দাঁড়াইবার আরএকবার ব্যর্থ চেষ্টা করিয়া পূর্ব্ববৎ ডাকিল,—‘আশ্‌মানী !’ পিতার কণ্ঠস্বরে কন্যার নিদ্রাভঙ্গ হইল, সে চক্ষু মুছিতে মুছিতে জিজ্ঞাসা করিল,—‘কখন এ’লে বাবা ! নেয়ে এস, তোমার ভাত বেড়ে রেখেছি ।’

‘আমি আজ খাব না ।’

আশ্‌মানী সান্ধ্যে জিজ্ঞাসা করিল,—‘কেন খাবে না বাবা ?’

‘আমার ক্ষিদে নেই ।’—কন্যার নিকট এত বড় একটা অসত্য উচ্চারণ করিয়া রহমান কিঞ্চিৎ অপ্রতিভ হইল । আশ্‌মানী কোনও উত্তর দিতে পারিল না, বিষ্ময় বিস্ফারিত নেত্রে পিতার আতপ-তপ্ত মলিন মুখের দিকে একদৃষ্টে কতক্ষণ তাকাইয়া থাকিয়া জিজ্ঞাসা করিল—‘অমন করুছ কেন বাবা ! কি হয়েছে বল না—জমিদার বাড়ী থেকে কেন ডাক্তে এসেছিল ?’

রহমান এই সকল প্রশ্নের কোনও উত্তর দিল না, একদৃষ্টে মৃন্তিকার পানে চাহিয়া রহিল । আশ্‌মানী ভীত হইয়া পুনরায় জিজ্ঞাসা করিল, ‘অমন করুছ কেন বাবা ? কাল সমস্ত দিন উপোস করেছে, আজও এতটা বেলা হ’ল কিছুই খাওনি, তবু বলছ তোমার ক্ষিদে নেই !’

রহমান কোনও উত্তর দিল না দেখিয়া আশ্‌মানী ধীরে ধীরে আসিয়া পিতার দুই হাত আপন হাতের মূঠোর মধ্যে চাপিয়া ধরিয়া কহিল,— ‘যাও বাবা নেয়ে এস, চারটে খাবে খন।’

জননীর মৃত্যুর পর তিনটি বৎসর কাটিয়া গিয়াছে। দরিদ্র পিতার স্নখ দুঃখের সমব্যথী আশ্‌মানী এমনি ভাবেই পিতাকে সেবা করিয়া আসিতেছে, সমস্ত যাতন। ক্লেশ রহমান সংসারে একমাত্র কন্ঠার মুখ দেখিয়াই সহ্য করিয়াছে। আশ্‌মানীর আদ্যার উপেক্ষা করিবার মত শক্তি রহমানের যে একেবারেই নাই অস্তুতঃ সে জ্ঞানটুকু লইয়াই সে পিতার হাত চাপিয়া ধরিতে সাহসী হইয়াছিল। রহমান জোর করিয়া কন্ঠার হাত হইতে আপনার হাত ছিনাইয়া হইল। আশ্‌মানী ধাক্কা খাইয়া পিছাইয়া গেল, পিতার মনোভাবের আকস্মিক অস্বাভাবিক পরিবর্তন লক্ষ্য করিয়া সে বিস্ময়াবিষ্ট হইয়া অদূরে নিশ্চল প্রস্তর প্রতিমার মত দাঁড়াইয়া রহিল। তাহার চক্ষু অশ্রু-সঞ্জল হইয়া উঠিল।

[দুই]

অগণিত নক্ষত্রপুঞ্জের বিমল-স্নিগ্ধোজ্জ্বল-কিরণমালার মধ্যবর্তী সুনির্মল শশধর অমল জ্যোৎস্নাধারা ঢালিয়া রহমানের জীর্ণ কুটীরখানাকে প্লাবিত করিয়া দিতেছিল। একটা শতচ্ছিন্ন মাদুরের উপর পিতা তাহার সংসারের একমাত্র অবলম্বন কন্ঠাকে লইয়া নিদ্রা যাইতেছে। শিয়রস্থিত মুৎ-প্রদীপের ক্ষীণ আলোক-রেখা কুটীরখানাকে আলোকিত করিতে যথাসাধা চেষ্টা করিতেছে। রাত্রি দ্বিপ্রহর অতিক্রম করিয়াছে। নিশাচর পাখীর কর্কশ স্বরে সহসা রহমান জাগ্রত হইয়া উঠিয়া বসিল ও নিম্পলক নয়নে নিদ্রিত কন্ঠার মুখপানে চাহিয়া রহিল। ভগ্নগৃহের এক অংশের মধ্য দিয়া একখণ্ড চন্দ্ররশ্মি তাহার মুখে পতিত হইয়া অপূর্ব শোভা ধারণ করিল। সহসা রহমানের চক্ষু হইতে দুই বিন্দু অশ্রু ঝরিয়া পড়িল ; চক্ষু মুছিয়া গৃহাভ্যন্তরে তীব্র দৃষ্টি নিক্ষেপ করতঃ সে অপ্রশস্ত আঙ্গিনায় আসিয়া দাঁড়াইল। রহমান দেখিল উর্দ্ধে অসংখ্য হীরক-খচিত প্রকৃতির বিচিত্রিত বসনাঞ্চল, আর প্রেমিক শশাঙ্কের অমিয় হস্ত-প্রস্রবণ। চতুর্দিকে চাহিয়া দেখিল সন্তজ্যোৎস্নান্নাত প্রকৃতির রজত-সুধমা, বাহার লোভে সে প্রত্যহই এই আঙ্গিনায় বেতের মোড়ার উপরে বসিয়া গুড়-গুড়ি টানিত। জমিদারের লুকুম হইয়াছে,—আজই তাহার গ্রাম হইতে চলিয়া যাইতে হইবে, নচেৎ পরদিনই তাহাকে গেরেপ্তারী দেওয়া হইবে ; কারণ সে গরীব এবং তাই কয়েক বৎসরের খাজানা দিতে পারে নাই। তাহার পিতা পিতামহ হইতে আরম্ভ করিয়া চতুর্দশ পুরুষ পর্য্যন্ত এই গ্রামের কোলে মানুষ। কতদিন রহমান সবুজ ঘাসের ক্ষেতে গরু চড়াইতে গিয়া ওই বাবুলা তলার শীতল ছায়ায় ঘুমাইয়া পড়িয়াছে,—দিশেহারার মত সে ইহাই ভাবিতে লাগিল। এই নৈশ নীরবতা ভেদ করিয়া দক্ষিণ দিকের কদম গাছটার ডাল হইতে একটা পেঁচক কর্কশ কণ্ঠে ডাকিয়া উঠিল, শুনিয়া রহমান চমকিয়া উঠিল। আন্তে আন্তে গৃহাভ্যন্তরে প্রবেশ করিয়া নিদ্রিত কন্ঠার মাথায় হাত দিয়া মৃদুকণ্ঠে ডাকিল, ‘আশ্‌মানী !’ আশ্‌মানী নড়িল ; দেখিয়া

রহমান সহসা দুই পদ পিছাইয়া গিয়া মাটিতে বসিয়া পড়িল। ভাবিল, তাহাকে কি করিয়া এই নিদারুণ সংবাদ দিবে। অতীতের বেদনাময় জীবনের সমস্ত ইতিহাসটা তাহার স্মৃতিপটে উজ্জ্বল হইয়া ভাসিয়া উঠিল।

আশ্‌মানী সেইদিনই রহমানকে জিজ্ঞাসা করিয়াছিল, কবে তাহার চারা আম গাছটায় মুকুল ধরিবে! তাহার সযত্নরোপিত তরকারী বাগান কেমন করিয়া আশ্‌মানী ছাড়িয়া যাইতে বাধ্য হইবে! তাহার সুখদুঃখময় ছোট্ট সংসারটিকে চিরতরে পরিত্যাগ করিয়া সে নিরাশ্রয়ে কোন্‌ ঠিকানায় বাহির হইয়া যাইবে? ভাবিতে ভাবিতে রহমানের চোখের জল ঝরিতে লাগিল। কিন্তু আজ রাত্রিতেই তাহাকে গৃহত্যাগ করিতে হইবে; জমিদারের হুকুম—না মানিলে রক্ষা নাই।

রহমান আপনার মায়া কাটাইতে পারিলেও পারিত কিন্তু কন্যার কথা ভাবিয়া সে আকুল হইল। এই ক্ষুদ্র বাস্তবিতার সহিত তাহার অপেক্ষা বালিকা কন্যার অন্তরের টান বেশী বলিয়া আজ তাহার বোধ হইল। রহমান ব্যথাভরা বুকখানা লইয়া আকাশের দিকে চাহিল, দেখিল যেন আকাশ সহস্রচক্ষে তাহারই দিকে চাহিয়া হাসিতেছে।

শরশর করিয়া একটা উদ্গাদ দখিণ হাওয়া বাব্‌লাগাছের শাখা ডুলাইয়া দিগ্‌দিগন্তে ছুটিয়া গেল।

[তিন]

‘আশ্‌মানী! একটা কথা বলব, রাখ্‌বি তো?’

‘কি কথা বাবা?’

‘রাখ্‌বি কি না আগে তাই বলনা, না রাখ্‌লে বলবনা।’

‘রাখ্‌বার হ’লে নিশ্চয়ই রাখ্‌ব বাবা, কোনও দিন কি অবাধ্য হ’তে দেখেছ?’

‘হাঁ রাখ্‌বার হ’লে.....’ রহমান চমকিয়া উঠিল, কথাটা তাহার নিকট রাখ্‌বার মত কি না তাই ভাবিতে লাগিল।

‘কি, চুপ করে রইলে যে? বল না?’

‘বল্‌ছি।...আজ এখনি আমাদের এ’বাড়ী ছেড়ে চলে যেতে হবে, জমিদারের হুকুম, বুঝেছিস্? নইলে.....’

জমিদারের আদেশ পালন না করিলে যে কি হয় তাহা তাহার অবিদিত ছিল না, তাই সে বাধ্য দিয়া বলিল,—‘কোথায় যাবে বাবা?’

‘রামপুরে চট্‌কলে কাজ করতে যাব। এখুনি রওয়ানা হ’তে হবে, অন্ধকার থাক্‌তে থাক্‌তে আমাদের রামপুরের পথে পড়্‌তে হবে।’

সবিস্ময়ে আশ্‌মানী কহিল,—‘এখুনি ?’

রহ্‌মান দৃঢ়কণ্ঠে উত্তর দিল,—‘হাঁ, এখুনি ।’

‘এখানে আর আমরা আসবনা বাবা ?’

‘না—আর আসতে হবেনা ।’

‘এ’ বাড়ী কা’র তবে, বাবা ?’

‘যে যখন বাস করে তার ।’

‘আমরা এতদিন এ ভিটের রইলুম..... ।’

‘আরে বোকা মেয়ে, এতদিন গায়ে জোর ছিল, জমিদারের কাছে লাগ্‌তাম ; এখন বুড়ো হ’য়েছি, দুটো পয়সা উপায় কত্তে পারিনে, আমার দ্বারা তাঁর আর কাজতো হয়না আর হ’বার আশাও নেই ।’

‘এষে ঘোর অবিচার বাবা !’

হাঁ, মা, দুর্বলের এমন করেই অবিচার অত্যাচার সহিতে হয়,—এ যে সংসারেরই রীতি ।

‘তবে বাবা এ গ্রামের সঙ্গে সমস্ত সম্পর্কই আজ হ’তে উঠে গেল ?’

রহ্‌মান নিরুত্তর, তাহার অন্তরের প্রতি পরতে পরতে যেন এই কথার তীব্র প্রতিবাদ ধ্বনিত হইয়া উঠিল ।

আশ্‌মানী মুদুকণ্ঠে ডাকিল, ‘বাবা !’

একবিন্দু তপ্ত অশ্রু রহ্‌মানের শিথিল গণ্ডদেশ বাহিয়া নীরবে মৃত্তিকা চুষ্মন করিল । কণ্ঠস্বর বাষ্পরুদ্ধ হইয়া গেল, কোন উত্তর দিতে পারিল না ।

আশ্‌মানী পিতার মনোভাব বুঝিতে পারিয়া তাহার দুই হাত চাপিয়া ধরিয়া বলিল,—‘বাবা, চল—এখনি চল ; যে দেশে এমন অত্যাচার সে দেশে থেকে দরকার কি বাবা ?’

এমন একটা ছোট্ট মেয়েও যখন বুঝিতে পারিয়াছে যে, যে দেশে দুর্বলের প্রতি সবলের অমন কঠোর অত্যাচার সে দেশে বাস করা অনুচিত তখন রহ্‌মানের আর দুঃখ করিবার কিছুই রহিল না । সে আকুল প্রাণে কণ্ঠকে তাহার রোগজীর্ণ বক্ষে জড়াইয়া ধরিয়া বলিল,—‘মা, চল মা, তুই আমার ঘরের লক্ষ্মী, তুই সঙ্গে থাকতে আমার দুঃখ কি ?’

একটা কোকিল বাবলাগাছের ডালে বসিয়া যামিনীর গভীর নীরবতা ভগ্ন করিয়া দিয়া গেল ।

[চার]

শীতের প্রবল প্রকোপ উত্তরোত্তর বাড়িয়া চলিতে লাগিল । আকাশে কৃষ্ণাফমীর অর্ধচন্দ্র অমুজ্জল কিরণ-জাল বিকীর্ণ করিয়া ধরিত্রীর শতধা-বিভক্ত বিশুদ্ধ বক্ষ আলোকিত করিবার যথাসাধ্য চেষ্টা করিতেছে ।

রামপুরের এক বস্তির ভিতর একটা মাটির দেওয়ালঘেরা জীর্ণ গৃহে রুগ্ন রহমান সেবারতা কণ্ঠকে ক্ষীণকণ্ঠে জিজ্ঞাসা করিল,—‘রাত কত আছে, মা ?’

‘রাত বেশী নেই, তুমি ঘুমোও বাবা ।’

রহমান কতক্ষণ নিরুত্তর থাকিয়া কণ্ঠকে কাছে টানিয়া লইয়া কহিল, ‘আমি সত্যি বলছি মা, বাড়ী গেলে আমার রোগ সেরে যাবে ।’

আশ্‌মানী গোপনে চক্ষু মুছিয়া কহিল, ‘তুমি ভাল হয়ে নাও বাবা, একবার বাড়ী যাব, খন ।’ রহমান ভাবিল—‘ভাল হবত ? আর যদি না হয়, তবে এ জীবনে আর বাড়ী যাওয়া হ’লনা ।’ পরক্ষণেই তাহার মনে হইল—বাড়ী ? তাহার বাড়ী কোথায় ? সেখানে তাহার কি আছে ? ষথাসাধ্য চেষ্টা করিয়া মনের এই চিন্তা দমন করিয়া রহমান কহিল,—‘না, চল আশ্‌মানী, এক্ষুনি যেতে হবে, সেখানে না গেলে যে আমি ভাল হ’বনা !’

আশ্‌মানী বাধা দিয়া কহিল, ‘ডাক্তার যে তোমায় ঠাণ্ডা লাগাতে নিষেধ করেছে, বাবা !’ রহমান চীৎকার করিয়া বলিয়া উঠিল,—‘বাড়ী যাব, ডাক্তার কে আবার ? আমার ছোট্ট ভিটে খানা যে আমায় তার দিকে টানছে !’

আশ্‌মানী বুঝিল, পিতা প্রলাপ বকিতেছে, কিন্তু সে আপত্তি করিতে পারিল না ।

ঘণ্টা খানেকের মধ্যে রোগজীর্ণ রহমান কণ্ঠার হাত ধরিয়া রহমপুরের পথে বাহির হইল, যখন গ্রামের নিকটে আসিয়া পৌঁছিল তখনো রাত্রি প্রভাত হয় নাই ।

রহমান তাহার পরিচিত বাব্বা গাছটা দেখিয়া বলিয়া উঠিল,—‘দেখ্‌ছিন্‌ মা, ওই আমার বাড়ী দেখা যাচ্ছে, চল একটু তাড়াতাড়ি চল ।’

আশ্‌মানী বস্ত্রাঞ্চলে চোখ মুছিল । রহমান বলিল, ‘কাদছিন্‌ কেন মা ? আজ যে আমাদের বাড়ী ফেরার দিন !’

রহমান বাব্বা তলায় গিয়া থমকিয়া দাঁড়াইল । এইখানে যে সে গ্রীষ্মের দিনে বলিয়া সম্মুখের দিগন্তজোড়া মাঠের লীতল হাওয়া কত দিন উপভোগ করিয়াছে ! সহসা রহমান বলিল,—‘এখানে একটু বসে নেই মা, বড় পরিশ্রম হ’য়েছে ।’

রহমান বলিয়া ধীরে ধীরে ঘাসের উপর তাহার জীর্ণ দেহখানা এলাইয়া দিয়া সম্মুখের উষার প্রথম রক্তরাগে অনুরঞ্জিত তাহার চিরপরিচিত গৃহখানার দিকে নির্ণিমেষ নেত্রে চাহিয়া রহিল । গভীর তৃপ্তিতে ধীরে ধীরে তাহার চক্ষু দুইটি যেন নিদ্রাবেশে মুদ্রিত হইয়া আসিল, শিথিল লীর্ণদেহ স্নিগ্ধ তৃণ শয্যায় এলাইয়া পড়িল । পূর্বদিগন্তের অরুণদ্যুতি তাহার পাণ্ডুর মুখমণ্ডল স্নান হাস্যবিভায় উদ্ভাসিত করিয়া দিল !

শ্রীশান্তোষ ভট্টাচার্য্য ।

শক্তির বিকাশ ।

ঘরে বাইরে সর্বত্র শক্তির খেলা চলছে, তার বিকাশ চিরদিন ধরে । স্থিতির গোড়া থেকেই এর সূরু—ঐস্রাফিলের প্রলয় সিন্ধা বাজার পরেও এর আধিপত্য থাকবে ।

শক্তির বিকাশ এ জগৎটাই ; একে চাপা দিতে কেউ পারে না—স্বয়ং বিধাতাও তার ব্যতিক্রম করেন নীনা ; কারণ এইটাই তাঁর স্থিতির উদ্দেশ্য । গোলাব যে দিন ফোটা ফোটা — মাধুর্য্য তার সেই দিন ! তার আগে বা পরে তাকে সুন্দর কেউ বলে না—আদর করতে কেউ চায় না তেমন প্রাণ দিয়ে ।

শক্তি নিয়েই জীব—শক্তি নিয়েই জগৎ ; সংঘর্ষণ তাই অহরহঃ । আর এই সংঘর্ষণেই বিশ্বের অস্তিত্ব—স্থিতির মূলেও এই সংঘর্ষ ।

শক্তি সাধনায় তাই জীব মাতিতে চায়, শক্তি তার প্রকাশ কর্তে চায় বিশ্বের বুকে ; বিশ্বের কাজে তাকে খাটাতে চায় ; বিশ্ব-সৌন্দর্য্য তার শক্তি সাধনারই অমর দান ।

সমর্থই ভগতে বাঁচে, দুর্বল প্রতি পদে মরে—ব্যথার আঘাতে মুইয়ে পড়ে তার যথা-সর্বস্ব । কিন্তু জীবকে বাঁচতে হবে,—বাটার জন্তই তার আসা । বাঁচতে হবে তাকে শত প্রতিকূলতার মধ্যে ; প্রতিকূল শক্তির বিরুদ্ধে তাকে অর্জ্জন কর্তে হবে এক দুর্জয় শক্তি । ওর ক্ষুদ্র শক্তির উপর নিজের জয়ী শক্তিটাকে আরো সবল—সফল ক'রে তুলতে হবে ; নইলে আর একটা সংঘর্ষ এসে তাকে চূরমার ক'রে ফেলতে পারে ।

জগতে বাঁচা যেমন সত্য, তেমন সত্য শক্তি অর্জ্জন করাও ; দিনে দিনে গুটিগুটি চলে পতনকে দাবিয়ে চাই শক্তি অর্জ্জন । অদৃষ্টির লেখা ব'লে কিছু নাই—“অদৃষ্ট তো মানুষ নিজেই তৈরী করে ।” নিজের হাতে না খেলে যেমন ক্ষুধা যায় না, তেমন নিজের হাতে নইলে অদৃষ্ট গড়ে না । মানুষের নিজ কার্য্য আর আচার ব্যবহার সমষ্টিতেই তো চরিত্র গড়ে উঠে ; খোদা কারো চরিত্র নিজের হাতে গড়ে দেন নি । অদৃষ্ট তো এই চরিত্রেরই গোণ ফল । চরিত্রের দরকার কেন ? মানুষ ব'লেই তো—বাটার জন্তই তো ? অবনতি যেখানে, সেখানে স্বভাব আর কর্ম্মধারার দৌর্বল্য দোষ ; সুখ দুঃখতো জীবের নিজেরই কর্ম্মফল । এখানে কর্ম্মই সব । নীরব নিশ্চেষ্ট বসে যে, তার উন্নতি তো খোদা নিজে এনে কোন দিনই দেননি—দেবেনও না । এই কর্ম্মকেই বলতে চাই অদৃষ্ট । কর্ম্মই জীবন—কর্ম্মই তার সমাপ্তি ।

কর্ম্মই শক্তি সাধনা—শক্তি অর্জ্জন । উন্নতি আনে তো পরিশ্রমই । এখানেই আমাদের সাধনা—শক্তি-সন্ধান । চাই পরিশ্রম—চাই শক্তি । মানুষ আসে বাটার জন্ত—মরার জন্ত নয় ।

শক্তি একদিনে দুর্জয় হয় না। পূর্ণ শক্তিতে বিকাশ পায় না — চাই বহুদিনের মরণপণ সাধনা — পতনের বার বার আঘাত ; আঘাত নইলে যে ব্যথা জন্মে না, দুঃখ আসে না ; বাধা দেওয়ার জন্ম—প্রতিশোধের জন্ম প্রবৃত্তি ‘চেতন মানে না’। অপমান তাই চাই আমার সম্মান লাভের জন্ম—মৃত্যু তাই চাই আমার বাঁচার জন্ম। সাকল্য আসে বিফলতার ভিতর দিয়েই ; ইচ্ছা-শক্তি যেখানে প্রবল নয়, সাকল্য সেখানে ধরা দেয় না — খোদার আশীষ সেখানে ঝরে না। চাই দুর্জয় সাধনা।

অক্ষম এই ক্ষীণ দেহ-যষ্টি শক্তির খেলায় মেতে উঠতে পারবে না ব’লে তোমার ব’সে থাকা চলবে না, ক্ষীণ তোমার প্রাণে তেমন বল জুটবে না ব’লে অজুহাত দেখানো—সে হবে না ; যোগার তোমার কর্তেই হবে—একদিনে না হোক, দশদিনে না হোক—যুগান্তে তো সে শক্তি সঞ্চিত হবে। হয়তো ছুটে আসতে চাইবে মরণ বাধা দিতে ; ভীত হ’লে তা’তে চলবে না ; সাধনার তা ধম্মই নয়।

শক্তি সাধনার প্রকার দুই—মানসিক বা আধ্যাত্মিক আর শারীরিক। মানুষের চাই এ দু’য়েরই সাধনা। মনের সাথে শরীরের সম্বন্ধ যেমন ঘনিষ্ঠ, তা’তে শুধু শরীরের দিকেই মনঃসংযোগ করলে সাধনার পূর্ণতা আসে না ; অথবা শুধু নিচক আধ্যাত্মিক চর্চায় মনোনিবেশ করলে তাও যাবে বিফলে। একের অভাবে অন্নের টেকা দায়। দেহইতো মনের আবাস। শরীর যেখানে অস্বীকৃত—মনের অস্তিত্ব সেখানে অসম্ভব। বর্তমান ছাত্রসমাজ তার উজ্জ্বল দৃষ্টান্ত—ডিগ্রী অর্জন করার জন্ম দেহপাত ক’রে তারা বসে, স্বাস্থ্যের দিকে মন দেওয়া দরকার বোধ করে না ; তাই দৃষ্টিশক্তি তারা হারিয়ে বসে, শরীর ধারণের মত শক্তিও তাদের থাকে না। একটা কিছু তারা হয় বটে, কিন্তু সে হওয়া কোন কাজের হওয়া নয়। যখন তাদের শরীরের দিকে একবার চোখ পড়ে—নিজে নিজেই তারা যুগা বোধ করে।

শক্তি অর্জনের জন্ম শারীরিক পরিশ্রমের পরিমাণটা মানসিক পরিশ্রমের অনুপাতে না হ’লে জড়তা আসা সেখানে সম্ভবপর — মনঃশক্তি নিস্তেজ হওয়ার খুবই সম্ভাবনা।

বেঁচে থাকতে হ’লে চাই আমার এ দু’য়েরই সাধনা। বাহ্যর শক্তিই শুধু বাঁচাবে না, তার সাথে চাই জ্ঞান আর বুদ্ধির যোগ। অগ্নির দাহিকা শক্তি আছে বটে, কিন্তু সে শক্তি বায়ুর সহায়তায়ই অতটা প্রবল হ’তে পারে। বায়ু সদা প্রবহমান না থাকলে অগ্নির সে শক্তি হ’ত না—হলেও ততটা জ্বোরের হ’ত না।

আজ এসেছে শক্তি সাধনার যুগ। এ যুগে নবীন তোমার অর্জন কর্তে হবে তোমার বাঁচার শক্তি—এক দুর্জয় অক্ষয় শক্তি—বজ্রে যা টলবে না, পতনের আঘাতে যা ম্লান হবে না—ম’রে যাবে না।

সব কিছু তোমার নির্ভর কচ্ছে এ সাধনার উপর। এতে তোমার সাকল্য যতটুকু তোমার চলার পথে, উত্থানের পথে উন্নতি ততটুকুই। শক্তির বিকাশ যারা যতটুকু কর্তে পেরেছে, বিশ্ব-প্রতিদ্বন্দ্বিতার তারা তত উজ্জ্বল উঠেছে। শক্তি যখন মুঢ় জীবন-জোড়া পতন তখন অবশ্যজ্ঞাবী।

আবদুস ছামাদ খাঁ।

উড়ে চিঠি ।

প্রিয় সম্পাদক মহাশয়,

রামায়ণে একটা গল্প আছে—বোধ হয় জানেন, না জানার কোন নজির নাই, কারণ আপনারা সবজ্ঞানী—সমুদ্র বন্ধনের সময় একটা ক্ষুদ্র কাঠবিড়ালী তা'র লেজুড় দিয়ে বালুকা উৎক্ষীপ্ত ক'রে সেতুর উপর দিচ্ছিল, তা'দেখে উপস্থিত সবাই হেসে উঠেছিল ; তা'তে সে উত্তর দিয়েছিল,—“তোমরা সবাই বড় কাজ ক'রে বড় বাহবা নেবে, আর আমি ছোট কাজ ক'রেও কি একটা ছোট বাহবা নেব না ?”

কাঠবিড়ালী বুনোজন্তু,—আর একেবারে সেকলে । বিংশ শতাব্দীতে মানুষ হ'য়ে জন্ম নিলে সে তথাকথিত সভ্যসমাজ থেকে hooted out হ'ত ; ডি, এল, রায়ের ভাষায় ‘একঘরে’ হ'য়ে থাকত । কারণ এখন সবাই বড় হ'তে চায় । ছোট কাজ ক'রে বড় মুনাকা হুদ সমেত আদায় করতে চায় । যাক্, আদার ব্যাপারীর জাহাজের খবর কেন ?

আপনাদের তাড়না, বন্ধুবান্ধবের গল্পনা—আর, বলতে কি,—প্রশংসা পাওয়ার বাসনা,—আমার ‘কাঁচা আমি’কে পাগল ক'রে তুলেছে । Hostel Lord পাগুলা গারদে না পাঠালেই বাঁচি ।

আপনারা কুস্তার্গের মত ঘুমিয়ে পড়েছিলেন ; কাঁচা ঘুম ভেঙ্গে গেছে, সংস্কার-রথের চাকা টানতে লেগে গেছেন, কাজেই আপনাদের টানের চোটে অনেককেই রথের তলায় প'ড়ে—বিষোর বিপাকে প'ড়ে—অপরিপক্ব (?) অবস্থায় চিত্রগুপ্তের কাছে হাজিরা দিতে হবে এটা আমি হলপ্ ক'রে না বলতে পারলেও অনুমান অথবা কল্পনা ক'রে নিতে পারি ।

যাহোক্ তবুও নূতন কিছু গ'ড়ে তুলতে পারবেন আপনারা । বেশী কিছু লিখতে চাই না । একেইত প্রবন্ধের (না কবন্ধের ?) জন্ত লেখক-প্রভুদের বাড়ী বাড়ী হেটে পা অবশ্য হ'য়ে গেছে, তার উপর যদি উকীলের বাড়ী যাতায়াত করতে হয় তবে আপনাদের দশা কি ঘটবে তা দিব্যচক্ষে দেখতে পাচ্ছি ।

ভাল ছেলেটির মত চুপ্‌টী ক'রে বসে—যদিও চুপ থাকার কথা আমার কোষ্ঠীতে নেই, তবুও আপনাদের খাতিরে (ভয়ে নিশ্চয়ই নয়)—প্রবন্ধ লিখতে বসলুম । কিন্তু হায় রে, “অভাগা যতপি চায় সাগর শুকিয়ে যায় ।” ত্রেতাযুগের ত্রাকরকে দেখে সাগরের বুক শুকিয়ে গেছিল, আমার মত লেখক দেখে এই কলিযুগেও ভাবের নদীতে চড়া প'ড়ে গেল । এই চড়ার উপর বসে আকাশ পানে হা করে চেয়ে আছি, যদি আবার সে ফিরে এসে আমাকে ভাসিয়ে নিয়ে যায় ।

কবিতা লিখতে বসেছিলুম। কিন্তু এক বন্ধুপ্রবর সূচনাতেই ব'লে ফেললেন,— “তুমি কবি হ'লে আমার ঘরের কোণের তেলোপোকাটাও দেখছি পাখী হ'য়ে উঠবে।” সাধে কি আর মেকলে সাহেব বাঙ্গালীকে হিংস্রটে ও মিথ্যাবাদী ব'লে গাল দিয়েছেন? মনের গুমর চেপে রেখে ভাবতে লাগলুম। আকাশ পাতাল ভাবতে ভাবতে এক খেলাল চাপ্পল—ছোটগল্প লিখব। যেই ভাবা অমনি ব'সে যাওয়া! শ্রীরামপুরী কাগজ; পি, এম্, বাগ্‌চীর কালী ও উজিরপুরী নিব (কারণ, দেশী গল্প লিখতে দেশী উপকরণ লাগে,— পশুভেরা ব'লেন) ছবছ খরচ করে ‘হা’ হতোস্মি’পূর্ণ এক গল্প লিখে এক সম্পাদক ভায়ার নিকট পাঠালুম। কয়েকদিন পরে সে বেটা (ভদ্রতার খাতিরে মধুর সম্পর্কে আপ্যায়িত করলুম না) এক দীর্ঘ সমালোচনা ও টিপ্পনী কেটে লিখলেন—“আপনার গল্পের ‘ভাব’ নিছক চোরাই বিধায় গ্রহণ করতে পারলুমনা।” হায়রে অভাগা দেশ, এ দেশে গুণীর গুণ কেউ বুঝতে পারলেনা। পারবেই বা কোথেকে? ‘পড়িলে ভেড়ার শৃঙ্গে ভাজে হীরার ধার।’

আচ্ছা বলুন ত চোর নয় কে? জুলিয়স্‌ সিজার, সেকেন্দর শাহ, বক্ত্রিয়ার খিলিজি বা ক্লাইভ্‌ কোন্‌ সংজ্ঞায় পড়েন? চোর না সাধু? আচ্ছা বিচার করুন কে বড় চোর—যে আঁধারে চুরি করে সে? না যে দিনের আলোতে জগতে সবার সামনে অপরের বিস্ত হরণ করে সে? যে চুরির অপরাধে পরীক্ষাগৃহ হ'তে অর্দ্ধচন্দ্র খেয়ে ফিরে আসে সে? না যে অপরের নোট কণ্ঠস্থ বা ঠোঁঠস্থ ক'রে অপরের চিন্তাধারা ছবছ নকল ক'রে Ph. D. উপাধি পায় সে? চুরি কি নকলের Synonym নয়? অন্ততঃপক্ষে Secondary অর্থ ত? ধার ক'রে ধার স্বীকার না করলে নিছক চুরি করা হয়। কিন্তু একজনের জব আর একজনের জবের সঙ্গে মিলে গেলে যে মহাভারত অশুদ্ধ হ'য়ে যায় তার কোন শাস্ত্রীয় প্রমাণ নেই।

বাণীর বরপুত্র Shakespeare যখন স্বীয় অমানুষিক প্রতিভাদ্বারা সাহিত্যজগতে অপ্রতিদ্বন্দ্বী হয়ে উঠলেন তখন কতকগুলো নিন্দুক জুটল। তারা বলতে লাগল,— Shakespeare-এর নিজের কোন Originality নাই। তিনি অশ্লের প্রদর্শিত পন্থা অনুসরণ করেছেন মাত্র। “শঠে শাঠ্যং সমাচরেৎ” ব'লে একটা কথা আছে। তাই Landor সাহেব গর্জে উঠে বিক্রপের স্বরে বললেন, “Yet he was more original than his originals. He breathed upon dead bodies and brought them into life.”

Miller সাহেব এ কথাটা আরও ব্যাপকভাবে দেখিয়ে গেছেন তাঁর অমর মন্তব্য দিয়ে— “Poetry, drawing within its circle all that is glorious and inspiring, gave itself to but little concern as to where its flowers originally grew.” স্বভাব-কবি

ওয়ার্ডসওয়ার্থ যখনই নূতন কিছু শুভেন তখনই সেটাকে নিজের করে নূতন প্রাণ দিয়ে, মহীয়সী ক'রে গ'ড়ে তুলে সমাজের চোখের উপর ধরুতেন। De Quincey যদি বলতেন,—“ওটা আমিই তোমাকে বলেছি,—তখনই তিনি তাড়াতাড়ি বলতেন,—“না হে না, ওটা আমারই। অগ্নের ভাবের সঙ্গে নিজেকে assimilate ক'রে নিতে পারলেই বাহাদুরী।” জ্ঞানের অবতার বেকন সাহেবের মত—“I take all knowledge to be 'my' province,” এতে এই প্রমাণই হচ্ছে যে সত্যকার জিনিষটা কা'রও monopoly নয়। ওর উপরে আমার যে অধিকার আছে, পেচো বা প'দেমাশিরও সেই অধিকারই আছে। নকল বা অনুসরণ একই categoryতে পড়ে বটে, কিন্তু 'অনুকরণ' 'নকলের' সংজ্ঞা থেকে একটু উপরে। গুরুমশায় নিজ হাতে কলাপাতার উপর আখর এঁকে দেন, ছোট ছেলেরা তাকে মক্স করে। অনুকরণটাও একপ্রকার তাই। আদর্শ না থাকলে পূর্ণতা কুজ হ'য়েই থাকত, সোজা হ'তে পারতনা।

ঈশ্বরগুপ্ত না থাকলে বঙ্কিমচন্দ্রের সাহিত্যিক প্রতিভার সমীচীন বিকাশ হ'তনা। বৈষ্ণব কবিতার ভাব নিয়েই রবীন্দ্রনাথ বিশ্ববরেণা হ'য়েছেন। ভারতের লুপ্ত গৌরবকে সঞ্জীবনী দ্বারা বোধন করেছেন। রবীন্দ্রনাথের জবধারা নিয়েই শরৎচন্দ্রের সাহিত্য গ'ড়ে উঠেছে, যদিও তাঁর ভাষা, তাঁর বলবার ভঙ্গি তাঁর নিজস্ব। ভারতের মিস্টন হেমচন্দ্রের কবি-প্রতিভা মহিলা কবি শ্রীমুক্তা কামিনী রায়ের উপর প্রতিফলিত হ'য়ে ষোলকলায় পরিপূর্ণ হ'য়ে উঠেছে।

প্রতিভাশূণ্য ব্যক্তি যদি নকল করে তবে ব্যাপার গুরুতর হ'য়ে পড়ে। বঙ্কিমচন্দ্র বলেছেন,—“অক্ষম ব্যক্তির কৃত অনুকরণ অপেক্ষা ঘৃণাকর আর কিছুই নাই। একে মন্দ তা'তে অনুকরণ। নচেৎ অনুকরণ মাত্রই ঘৃণ্য নয়।” তিনি আরও বলেন, “অনুকরণমাত্রই অনিষ্টকারী নয়; কখন কখন তাতে অভাবনীয় সফলও জন্মে। প্রথমাবস্থায় অনুকরণ, পরে স্বাভাব্য আপনাই আসে।”

কিন্তু আমাদের মত লেখক ছবছ অনুকরণ (পরিষ্কার ভাষায় নকল) ক'রেও লজ্জিত হয় না। নিজের দোষের সাফাই গাহে। ‘Right of conquest, যদি right হয়, তবে Right of theft একটা right হবেনা কেন?’ এর উত্তর আপনারা দিতে পারেন কি?

ইতি—

শ্রী উনপঞ্চাশ শর্মা।

সাঁঝাই ।

সাঁঝ হলরে, সন্ধ্যা হল, ফুটলো তারার দীপমালা !
ফুলবিলাসী দখিন হাওয়ায় ঢুলছে সাঁঝের ফুলদোলা ।
চাঁদের চোখের চমক নিয়ে
জরুদা ঢেলীর উত্তরীয়ে
আল্পনা ছায় আলতো বাতাস সাঁঝাই সুরে মনভোলা ।

সবুজ ক্ষেতের আবুছা আলোয় মত্ত বাতাস দোলুখেলে ;
কোন্ গহনের স্বপ্নমোহে মল্লিকা চায় চোখ মেলে ;
কনক চাঁপার শীর্ণ ঠোঁটে
ক্লান্ত দিনের হাশ্ব ফোটে
রঙবেরঙের পান্দী ওড়ে হালুকা হাওয়ায় ঝিল্মিলে ।

রঙগরবী সোণার মোহর কৃষ্ণচূড়ার ফাগুগ্রাগে
তীব্র মদির-গন্ধে হেনার স্থপ্তি-শিথিল দিলু জাগে ।
বকুলবনে শিউরে পুলক,
গন্ধে মাতাল ভুলোক ছ্যলোক,
আধ-ফোটা ফুল-কলির ঠোঁটে চাঁদের আলোর চুম্বলাগে ।

পান্নাপাঁতির কণ্ঠমালায় সাজল অশথ্ দেবদারু,
জোছনা দলের ওড়না-আড়ে বল্লীবালায় বেশচাকু ;
চক্ষে হাসির বিজলী হেনে
অপ্সরা চায় আকাশ কোণে
নীল কাজলের কাজল লতায় সাজিয়ে তাদের যুগভুরু ।

ঝিল্লী-মুখর পল্লীবাটে ঘুর্ণী পথের মাঝখানে
স্তব্ধ বাতাস চম্কে ওঠে পল্লীবধুর কঙ্কনে,
কোন্ সে আকুল বাঁশীর সুরে
নিদহারা এ মর্ষপুরে
গোকুলবালা চম্কে ওঠে নবীন প্রাণের স্পন্দনে ।

কল্লনা আজ উধাও হল হালুকা পাখায় দিলু খোলা
আনন্দেরি হিম্মোলে আজ ঢুলছে প্রাণের ফুলদোলা—
বর্তমানের হর্ষে গানে,
অতীত দুখের বিসর্জনে,
নবীন প্রাণের গানের তানে হর্ষে ভুবন হরবোলা ।

শ্রীভূপেন্দ্রনাথ দে ।

হালী।

আধুনিক উর্দু-সাহিত্যে বাঁহাদের নিকট চিরকৃতজ্ঞতাপাশে আবদ্ধ, শামসুল ওলামা মওলানা আলতাফ হুসেন হালী সেই মনীষীদের সর্বপ্রথম। প্রচলিত উর্দু সাহিত্যকে সংস্কৃত করণোদ্দেশ্যে সাধনা-ক্ষেত্রে প্রবিষ্ট হইয়া তিনি ইহাকে যেই ভাব ও ভূষায় দেখিতে পাইয়াছিলেন, পরবর্তী কালে তাহা হইতে অনেক উচ্চতর আদর্শে, তিনি ইহাকে সংগঠিত ও সঞ্জীবিত রাখিয়া যান। তিনি যে সকল অমর গল্প গ্রন্থাদি লিখিয়া গিয়াছেন সে সকল যুগ-যুগান্ত-কাল উর্দুর জ্ঞান-ভাণ্ডারে অমূল্যসম্পদরূপে স্মৃতিসমাজের কাছে গৃহীত হইবে। সাহিত্যিকের কষ্টি-পাথরে তিনি এক প্রতিভাবান কৃতি স্রষ্টারূপে দেদীপ্যমান; তাঁহার সৃষ্টি অমুবর্তীকালের সাহিত্যচর্চায় খ্যাতি-অঘেষীদিগকে মহিমতর আদর্শ ও ভাব-প্রবণতায় অনুপ্রাণিত করিতে সমর্থ হইয়াছে ও হইবে।

১৮৩৭ অব্দে পানিপথ সহরে জন্ম পরিগ্রহ করিয়া দীর্ঘ ৭৭ বৎসর বয়সে ১৯১৪ খৃষ্টাব্দে আলতাফ হুসেন নিজ জন্মভূমিতে মরলীলা সংবরণ করেন। নবাব ইমাদুল মুল্কবিল-গ্রামীর নির্দেশানুসারে তিনি যে আত্মজীবনী লিপিবদ্ধ করিয়াছিলেন, তাহাতে তাঁহার ব্যক্তিগত বহু ইতিবৃত্ত দস্ত হইয়াছে। হালীর পূর্বপুরুষ আনসারীরা প্রায় সাত শতাব্দী যাবৎ পানিপথে অধিষ্ঠিত আছেন। এই বংশের আদিপুরুষ খাঁজামালাকজালি হেরাত হইতে গেয়াসউদ্দীন বল্বনের রাজত্ব সময়ে ভারতবর্ষে আগমন করেন। তিনি ৩২কালের সর্ব-প্রসিদ্ধ পণ্ডিত ছিলেন; সম্রাট বল্বন কাজেই পানিপথ পরগণায় কয়েক বিঘা উর্বর জমি জায়গীর দিয়া তাঁহাকে তথাকার কাজী নিযুক্ত করিয়াছিলেন। হালী পিতৃপক্ষে উক্ত মালাক আলির ও মাতৃপক্ষে এক সম্ভ্রান্ত সৈয়দ বংশের রক্ত-সম্ভূত।

আলতাফ হুসেনের বাল্যজীবন নানা বিষয় বিপত্তিতে ভরপুর। তাঁহার জন্মের অত্যল্পকাল পরেই তদীয় জননী সামান্য প্রকৃতির ক্ষিপ্ততা-রোগে আক্রান্ত হয়েন, আর নয় বৎসর বয়ঃক্রম কালেই তাঁর পিতৃদেব দেহত্যাগ করেন। “হায়াতে-হালী”র খ্যাতিনামা লেখক সৈয়দ মাহমুদ ফারুকের মতে হালীর পিতা উম্মাদ হইয়াছিলেন এবং মাতা দেহত্যাগ করিয়াছিলেন; কিন্তু এই বিবরণ সত্য নহে। সংসারে সবার নিকট হইতে বিচ্ছিন্ন হইয়া একমাত্র ভ্রাতা-ভগ্নীকেই তিনি নিজের পোষকরূপে প্রাপ্ত হইলেন। ধর্ম-কর্ম্মে নিবেদিত-প্রাণ আনসারীকুলের পর-পুরুষ হিসাবে তিনি সর্বপ্রাণে মৌখিক কোরাণ পাঠে বাধ্য হয়েন, অতঃপর তিনি পার্শী ও আরবী ভাষা অধ্যয়নার্থে গমন করেন; কিন্তু কোন শিক্ষা-গৃহের নিয়মিত শিক্ষালাভের সুবিধা প্রাপ্ত হইলেন না। পার্শীতে তাঁহার আদি-গুরু সৈয়দ জাফর আলি উক্ত ভাষায় তাঁহাকে

উত্তম রূপে শক্তিমান করেন। মৌলবী ইব্রাহিম হুসেন আনছারীর নিকটে তিনি আরবী অধ্যয়ন আরম্ভ করেন, সবেমাত্র লন্স্লেই হইতে ধর্মতত্ত্বে পণ্ডিত হইয়া তিনি তখন পানিপথে প্রত্যাবর্তন করিয়াছেন। তাঁহার শিক্ষা অধিক দূর অগ্রসর হইতে না হইতেই সপ্তদশ বৎসর বয়ঃক্রম কালে বিবাহিত হইবার জন্ত সংসারে বর্তমান ভ্রাতাভগ্নীরদ্বারা তিনি নিতান্ত ভাবে অমুরুদ্ধ হইলেন। পিতা মাতার অবর্তমানে ভ্রাতা ভগ্নীকেই হালী তুল্যরূপে শ্রদ্ধা করিতেন, তাই অতি আগ্রহের লেখা পড়ার দ্বার রুদ্ধ হইবে জানিয়াও নিতান্ত অনিচ্ছা সত্ত্বে তিনি বিবাহে অগ্রসর হন।

তাঁহার জীবন পিতামাতার অবস্থা সচ্ছল ছিল। তাঁহারা কতক দিনের জন্ত পত্নীর ভরণ-পোষণের ব্যবস্থা করিতে সমর্থ হইবেন জানিয়া হালী গৃহ-সংসার হইতে নিঃশব্দে সরিয়া পড়েন; এবং দিল্লীতে দেড় বৎসর ধরিয়া বিখ্যাত পণ্ডিত ও প্রচারক মোহলবী নোয়াজিস আলির অধীনে অধ্যয়নে রত রহেন। পুরাতন দিল্লী-কলেজ তখন উন্নতির উচ্চতমশিখরে আরোহণ করিয়াছে, ভারত-বিখ্যাত মৌলবী নাজীর আহমদ ও মুন্সী জাকাউল্লাহ্ তথায় বিদ্যাভ্যাস করিতেছিলেন। তিনি কিন্তু সেই কলেজে ভর্তি হইতে সাহসী হইলেন না, যেহেতু তিনি জানিতেন যে পানিপথে তাঁহার স্বজনেরা পাশ্চাত্যশিক্ষার বা ইংরেজী ভাষার যে কোনো প্রকার জ্ঞান লাভ সহ্য করিবার মত উদারমতাবলম্বী নহেন। তৎকালীন মুসলিম-ধর্মশাস্ত্রধীতরা ইংরাজী বিভাগের সমূহকে “মজহাল” নামে অভিহিত করিয়া—অতি হেয় চক্ষে নিরীক্ষণ করিতেন। এইরূপে পাশ্চাত্য-জ্ঞান-সঞ্চয়ে বঞ্চিত হইয়া তিনি প্রাচ্যশিক্ষাতেই আত্মনিয়োগ করেন; কিন্তু সেই পথেও বিঘ্ন উপস্থিত হইল। আত্মীয় স্বজনেরা তাঁহার অবস্থিতির সন্ধান পাইয়া তাঁহাকে স্বগৃহে প্রত্যাবর্তনার্থে ত্যক্ত বিরক্ত করিয়া তুলেন; ১৮৫৫ খ্রীষ্টাব্দে তাঁহারা তাঁহাকে গৃহে ফিরাইয়া লইতে সমর্থ হন। এই ঘটনায় অন্তরে তিনি নিতান্ত আঘাত পাইয়াছিলেন সত্য, কিন্তু বাটী ফিরিয়া তিনি বসিয়া রহিলেন না, নিজে নিজে বৎসরেক কালের মত জ্ঞান-চর্চা করিয়া লইলেন। কোনো চাকুরীতে প্রবিষ্ট হইবার জন্ত আত্মীয়েরা তাঁহাকে পুনর্ব্বার ধরিয়া বসিলেন; “হীসারে” ১৮৫৬ অব্দে কলেজের-অফিসে কোনো প্রকারে তিনি একটা ভালো চাকুরী যোগাড় করিয়া লন, কিন্তু সিপাহী-বিদ্রোহের অভ্যুত্থানে তিনি তথায় বৎসরেকের অধিক কাল অবস্থান করিতে সক্ষম হইলেন না। পুনর্ব্বার পানিপথে প্রত্যাবর্ত্ত হইয়া চারি বৎসর পর্য্যন্ত শুধু জ্ঞানালোচন-ব্যতীত তিনি আর কোনো দ্বিতীয় কর্ম্ম করিবার পাইলেন না। যদিও তাঁহার জ্ঞান সঞ্চয়ের পথে নানা প্রতিকূল ঘটনা আসিয়া বারম্বার বিঘ্ন জন্মাইতেছিল, তথাপি শিক্ষাক্ষেত্রে তাঁহার অন্তরাঙ্গা তৃষ্ণার্ত থাকিয়া যায় নাই; পার্শী ও আরবী ভাষায় তখনকার দিনে তিনি একজন অতি বিদ্বান বলিয়া প্রসিদ্ধি লাভ করিবার উপযুক্ত হইয়াছিলেন।

পানিপথে অবস্থিতিকালীন তিনি পার্শী ও আরবীতে কবিতা লিখিতে আরম্ভ করেন;

কারণ তৎকালে কবিতা-লিখার সামর্থ্যকে একরূপ পূর্ণত্ব-হিসাবে মাত্র করা হইত। দিল্লীতে যাতায়াত কালে প্রসিদ্ধ কবি “গালীবের” সংলগ্ন আশিবার পূর্বে তিনি নিজের অন্তরে সমাহিত কবি-স্বলত বিশিষ্ট গুণাবলীর সহিত পূর্ণ পরিচিত হইতে পারেন নাই। দিল্লীতে প্রথম অবস্থান-কালে তিনি গালীবের সংস্রবে আসেন; এবং প্রায়ই তাঁহার সাহচর্য্য সময়ে তাঁহাকে স্বরচিত কঠিন পার্শী ও উর্দু কবিতা সমূহ ব্যাখ্যা করিয়া দিতে জিজ্ঞাসা করিতেন। এই সকলের ভিতর দিয়া হালীর স্বাভাবিক কবি-শক্তি সম্বন্ধে গালীবের দৃঢ় প্রতীতি জন্মে। তিনি হালীকে কাব্য-চর্চার উপদেশ দিয়া বলেন যে যদি তিনি কবিতা হইতে সরিয়া থাকেন, তবে ইহার দিকে আপন মনের স্বাভাবিক ঝোঁকের প্রতি অগ্রায় জ্ঞাপন করা হইবে। গালীবের মত একজন বিখ্যাত কবির এ হেন উৎসাহে দিল্লীতে থাকিয়াই তিনি গোটা দুই গজল রচনা করেন। দিল্লীতে তিনি উত্তম সাধনার স্বযোগ প্রাপ্ত হয়েন নাই কিন্তু পরে বুলন্দসহর জেলাসুগত নবাব মোস্তফাখানের সহিত অবস্থান সময়ে তিনি কাব্য-চর্চার সহায়ক অতি চমৎকার ক্ষেত্র দেখিতে পান। সিপাহীবিরোধের পর নিস্তেজ জীবনে নিতান্ত ক্লান্ত হইয়া পানিপথে অবস্থিতির জন্য যাইবার পথে মোস্তফাখান কষ্টক তদীয় সহচররূপে থাকিতে অনুরুদ্ধ হইয়া তিনি তথায় ৭৮ বৎসর অতিবাহিত করেন। এই সম্রাস্ত পুরুষ নিজেও একজন খ্যাতনামা কবি ছিলেন। তিনি পার্শীতে “হসরতী” উর্দুতে “সেফ্তা” নাম দিয়া লিখিতেন। তিনি প্রথম দিল্লীতে “মমিনের” শিষ্য ছিলেন। মমিনের মৃত্যুর পর হইতে গালীবের সমীপে নিজের রচনা সমর্পণ করিতেন। সেফ্তার সাহচর্য্যে ও অনুপ্রেরণায় হালীর এত কালের অকথিত প্রতিভা ফুটতর হইবার এক বিরাট ক্ষেত্র প্রাপ্ত হইল আর সময়ের অতিবাহনের সঙ্গে সঙ্গে সেই প্রতিভা উজ্জ্বল হইতে উজ্জ্বলতর রূপে প্রদীপ্ত হইতে চলিল। সেফ্তার কবিতার সাথে হালীর কবিতা গালীবের সমীপে প্রেরিত হইত; কিন্তু গালীবের শুদ্ধিতে হালীর কবিত্বশক্তি ততদূর উন্নীত হয়নাই যতখানি হইয়াছে সেফ্তার অনুপ্রেরণায়। সেফ্তা অত্যাশ্চর্য্য পছন্দ করিতেন না, তিনি নিজের রচনায় সত্য ও স্বাভাবিকতা ফুটাইয়া তুলিবার পক্ষপাতী ছিলেন। তিনি সাধারণ ও সত্য ঘটনাসমূহকে সঠিক অবস্থায় বিবৃতির ভিতর দিয়া চিত্তাকর্ষক করিয়া তুলিতে প্রয়াস পাইতেন। এই দিক দিয়া তাঁর আদর্শ হালীর অন্তরে স্থায়ী গভীর ছায়াপাতে সমর্থ হয় এবং ক্রমে ক্রমে ইহা হালীর আপন আদর্শরূপে পরিণত হয়। হালী ইহাকে তাৎপর্য্যে সংস্কৃত করিয়া লয়েন এবং সাধনাতে সুস্পষ্ট করিয়া তুলেন।

জাহাঙ্গীরাবাদে অবস্থিতিসময়ে সম্ভবমত সহজ অথচ সরল ছন্দে ভাষায় কবিতা লিখিবার যেই অনুপ্রাণিত আগ্রহ হালীর মনে বিপুল হইয়া উঠে, সেফ্তার লোকান্তর গমনের পর লাহোরে পঞ্জাব-সরকারের বুক-ডিপোতে একটা চাকুরী-প্রাপ্তিতে তাহা

আর একটু বেগ প্রাপ্ত হয়। বুক-ডিপোতে তাহার কর্তব্য ছিল শুধু ভাবার প্রতিপত্তি-কল্পে শিক্ষাবিভাগের ইংরেজী পুস্তক সমূহের উর্দ্ধ অনুবাদ ও পুনঃ সংশোধন করা। চারি বৎসর যাবৎ তিনি সেই কার্যে নিয়োজিত ছিলেন। তথাকার অভিজ্ঞতা পরবর্তী কালে তদীয় জীবনে অতি প্রয়োজনে লাগিয়ছিল। সেখানকার কার্য্য-প্রণালী, জীবনের মহা উদ্দেশ্য সাধনের পথে অতি দরকারী পাশ্চাত্য প্রদেশের সর্বপ্রধান ভাষার সম্পর্কে তাঁহাকে আসিতে দেয়, এবং অনুবাদের ভিতর দিয়া যথাসম্ভব ইংরাজী জ্ঞানলাভে তাঁহাকে বিশেষভাবে অনুপ্রাণিত করে। 'এইভাবে নানা অবস্থাস্থর ক্রমাগত হালীর ভাবী মহিমময় সাহিত্যিকজীবনের সম্মুখে নানা সম্পদ, আকাঙ্ক্ষা ও উপায়ের দ্বার মুক্ত করিয়া দেয়।

আবদুল কাদের।

দান।

“রমজান-ঈদ-দিবসে আজিকে কে করিবে কিবা দান?”
 নবাব জহর শুধা’ল একথা রাজসভা মাঝখান।
 কহিল উজির,—“করি জিয়াফৎ মৌলবী আছে যত,
 করা’ব ভোজন এ’ ঈদের দিনে আপন সাধ্যমত।”
 দরবার-কাজী কহিলা গরবে,—“ওহে ছুনিয়ার স্বামী,
 মল্লুকের যত পীর-দরবেশ ভোজন করা’ব আমি।”
 কহিলা জহর ক্রীতদাসে ডাকি’ “কি,—করিবি তুই দান?”
 কহিল বান্দা,—“কি আছে আমার শুধু এই দেহ খান।”
 নবাব জহর ভাষিল রোষিয়া,—“ত্রিশদিন করি’ রোজা,
 ঈদের দিবসে না করিয়া দান বহিবি পাপের বোকা?”
 একথা শুনিয়া কহিল বান্দা নয়ন করিয়া ধির,—
 “আর্তের লাগি’ দিবে এই দাস এক ফৌটা আখিনীর।”

শ্রীআশুতোষ ভট্টাচার্য্য।

সাহিত্যে মৌলিকতা।

পুষ্প অপূর্ব সুন্দর। বিশ্বের প্রত্যেকটি ছন্দ, সৌরভ, লালিত্য সুসঙ্গত ও সুবিস্তৃত ভাবে পুঞ্জীভূত করিয়া বিধাতা পুষ্পের অপূর্ব তমুর সৃষ্টি করিয়াছেন। আকাশের বিরাট উদারতা, স্বর্গের বিমল শান্তি, বসন্তের প্রাণময় আনন্দ, নারীর প্রাণহান্য কটাক্ষ, শিশুর প্রাণখোলা হাসি—বিশ্ব-সৌন্দর্যের প্রত্যেকটি অঙ্গ পুষ্পের অঙ্গে জড়ীভূত। ভাবুক কবি তাহার সৌন্দর্য্যে সৌন্দর্য্যময়ের অপূর্ব সৌন্দর্য্যের অভিব্যক্তি দেখিতে পায়। কিন্তু বৈজ্ঞানিক অথবা সমালোচক? সে পুষ্পের প্রত্যেকটি দলকে টুকরা টুকরা করিয়া ছিঁড়িয়া স্বকীয় কষ্টিপাথরে পরখ করিয়া উদ্ভিত্তবে (না অদ্ভুততবে?) তাহাদের স্থান নির্ণয় করিয়া থাকেন। বৈজ্ঞানিক ও সমালোচকের এই নিষ্ঠুরমতায় ব্যথিত হইয়া কবি ওয়ার্ডসওয়ার্থ লিখিয়াছেন—
“Scientists peep and botanise their mother's grave.” কবি এবং ঔপন্যাসিক বিশ্বের সমস্ত কমনীয় ভাবে তুলির আঁচড়ে আঁকিয়া যান। যাঁহারা ভাবুক, সেই আলেখ্যের সৌন্দর্য্য উপভোগ করিবার প্রাণ যাঁহাদের আছে, তাঁহারা শুধু সেই সৌন্দর্য্যে আকর্ষণ নিমজ্জিত হইয়া তাহাতে মুগ্ধ হইয়া থাকেন এবং দোষগুণ না জানিয়াই তাঁহারা নিশ্চিন্ত রহেন। কিন্তু নিন্দুক সমালোচক সেই আলেখ্যের খুঁটিনাটি অনুসন্ধান করিয়া কুসুমের কীট-সন্ধানে প্রবৃত্ত হন। উপভোগ করিবার মত শক্তি যাঁহাদের নাই, সমালোচনা করিয়া দোষ নির্ণয়ের ক্ষমতা দিয়া ভগবান যেন তাহাদের সেই অভাব পূরণ করিয়াছেন। অবশ্য একথাও ঠিক যে উপভোগ না করিতে পারিলে সমালোচনা করা যায় না।

মানুষের জানিবার যাহা শক্তি, জগতে যাহা জানিবার আছে তাহার তুলনায় অনেক তুচ্ছ—নগণ্য। লক্ষ লক্ষ যুগ ধরিয়া জানিলেও তাহা শেষ হইবে না। মহাবিজ্ঞান নিউটন পর্য্যন্ত বলিয়াছেন,—“আমি জ্ঞানসমুদ্রের সৈকতভাগে উপলব্ধ সংগ্রহ করিতেছি মাত্র।” মানবের জ্ঞানের মাপকাঠিতে বিশ্বের জ্ঞানভাণ্ডারের অসীমতা মাপিতে যাওয়া বাহুল্য মাত্র। প্রাচ্য ও প্রাচ্যাত্যের পুরাতন যুগের মনীষীদের চিন্তাশক্তি, ভাবিবার ক্ষমতা, বিশ্বের জ্ঞানভাণ্ডারের অপূর্ব সম্পদ—বিশ্ব-সাহিত্যের অমূল্য রত্ন! শত শত বর্ষ হইতে মানুষের চিন্তাধারার যে প্রবাহ চলিয়াছে সাহিত্য তাহাকে স্থানে স্থানে সময়ে সময়ে নিজের বৃকে ফলাইয়া নিয়াছে। সাহিত্যের পুরাতন জানিবার একমাত্র উপায় প্রাচীন মনীষীদের লেখনীপ্রসূত গ্রন্থরাজি। সে সব আলোচনা করিয়াই আমরা সাহিত্যে নূতন ভাব ও জ্ঞানের আমদানী বুঝিতে পারি। বর্তমানে সাহিত্যক্ষেত্রে সকলেই সমস্বরে সমতানে চীৎকার তুলিয়াছেন—
“সব মামুলী, সব মামুলী—নূতন চাই, মৌলিক রচনা চাই। কিন্তু বিশ্বের অনন্ত জ্ঞানসমুদ্রের

কিয়দংশ মন্বন করিলে বুঝা যায় চিন্তার উপযুক্ত প্রায় সকল বিষয়ই ইতঃপূর্বে ভাবা হইয়া গিয়াছে। সুতরাং বর্তমানকালে মৌলিক রচনা অথবা নূতন সৃষ্টি আশা করা বাতুলতা মাত্র। পুরাতন কাম্বন্দী ঘাঁটিয়া যে সব চিন্তা ও ভাব একটু বেশী পুরাতন হইয়া গিয়াছে তাহাকে নূতন রঙে আঁকিয়া নূতন মূর্তিতে ফুটাইয়া তুলিলে আমরা তাহাকে নূতন বলিয়া আদর করিতে পারি কিন্তু তাহাকে “মৌলিক” অভিধানে অভিহিত করিতে পারি না। মৌলিক রচনা পাওয়া অতি দুর্লভ।

‘গ্যে’টে’ তাঁহার “Reflections and maxims”এ লিখিয়াছেন,—“চিন্তার উপযুক্ত সকল বিষয়ই ইতঃপূর্বে ভাবা হইয়া গিয়াছে। এখন সেই পুরাতন কাম্বন্দীই ঘাঁটিতে হইবে—‘নাশ্চঃ পশ্চা বিদ্যতে’।” যাহাই ভাবিতে যান তাহাই পূর্বে একজন ভাবিয়া গিয়াছেন দেখিয়া হতাশ হইয়া গ্যে’টে “La Bruyeres”এ বলিয়াছেন,—“All is said.” ভন্টেয়ারও তাই যাহা কিছু দেখিতেন বলিতেন,—“সবই নকল।” সুতরাং বাধ্য হইয়াই বিজ্ঞানের ভাষায় বলিতে হয়,—‘Thoughts like energy and matter are indestructible’—ভাবের বিনাশ নাই।

জগতের সকল সাহিত্যেই ইহার ভুরি ভুরি প্রমাণ পাওয়া যায়—দৃষ্টান্ত স্বরূপ প্রথম বাংলা সাহিত্য ঘাঁটিয়া দেখা যাক।

বাংলার আদিকবি চণ্ডীদাস ও বিদ্যাপতি—তারপর গোবিন্দদাস, লোচনদাস ও জ্ঞানদাস প্রভৃতি অনেক বৈষ্ণব-কবি বাংলা সাহিত্যকে অমূল্য রত্নরাজী উপহার প্রদান করিয়াছেন। কিন্তু ভাবুক জ্ঞানেন শেষোক্ত কবিগণ চণ্ডীদাস ও বিদ্যাপতির সিদ্ধ অনুকারী মাত্র। ভাবে ও ভাষায় তাঁহার চণ্ডীদাস ও বিদ্যাপতির কাছে “খাইয়া মানুষ।” পরবর্তী যুগের কবি ভারতচন্দ্র অন্নদামঙ্গল ও বিদ্যাসুন্দর লিখিয়া বৈষ্ণব সাহিত্যে অক্ষয়কীর্তি রাখিয়া গিয়াছেন কিন্তু সপ্রমাণ হইয়াছে বিদ্যাসুন্দর ইতঃপূর্বে অল্প এক কবির খাতায় স্থান পাইয়াছিল। মাইকেলের কাব্যাবলী যে প্রাচ্য ও প্রাচীণের পূর্বকল্পিত কল্পনা-প্রসাদাৎ তাহা কেহ অস্বীকার করিতে পারিবেন না। “পাণিপথের” কবি যে “পলাশীর যুদ্ধের” কবির ঘরে সিঁদ কাটিয়াছেন ইহা দুইটি বহি পাশাপাশি রাখিয়া পড়িলে একটা ছোট ছেলেও ধরিতে পারিবে। পাণিপথের ইতিহাস হইতে কয়েকটি প্লট ধার করিয়া “পলাশীর যুদ্ধের” ভাষার একটু ভোল ফিরাইয়া দিলেই পাণিপথের রচনা শেষ হইয়া যায়। কোন কোন স্থানে “পাণিপথে” ও “পলাশীর যুদ্ধে” লাইনে লাইনে মিলিয়া যায়। কবির রাজা স্বয়ং সেনাপায়ের পর্য্যন্ত তাহার পূর্ববর্তী লেখকদের রচনা লাইনকে লাইন তুলিয়া দিয়াছেন—সুতরাং পাণিপথের কবিকে এতদূর দোষ দেওয়া যায় না।

আবার বাংলার সাহিত্য-সম্রাট বঙ্কিমচন্দ্রের বহিগুলি একটু ঘোলাইয়া দেখিলে মনে হয় তিনি স্বপ্নের নিকট হইতে প্লট ধার করিয়া বাংলাসাহিত্যে নূতনত্ব আনিয়াছেন।

দুর্গেশ-নন্দিনী ও আইভানহো পাশাপাশি রাখিয়া পড়িয়া দেখিলে মনে হয় দুইটা বহি যেন এক খাতু দিয়া গড়া । তিলোত্তমা ও রেবেকার চরিত্রের সাম্যতা পাঠকের মনে কৌতূহলের উদ্রেক করে । ওসমান ও Bron de Gilbertএর চরিত্রে অনেকটা সাদৃশ্য আছে ; তবে ওসমান Bron de Gilbertএর মত এত ক্রুর প্রকৃতির ছিলেন না যদিও Bron de Gilbert, “রোয়েনা” এবং ওসমান “আয়েষাকে” ভালবাসিতেন । আয়েষা ও রোয়েনার চরিত্র খাপে খাপে মিলিয়া যায় । কিন্তু তলাইয়া দেখিলে বুঝা যায় রোয়েনার স্থান আয়েষা অপেক্ষা অনেক উচ্চে ; • রোয়েনার চরিত্র আয়েষা অপেক্ষা অনেক পবিত্র—অনেক মধুর । আত্মত্যাগ সম্পর্কে আয়েষা ও রোয়েনা প্রায়ই এক ধরনের । রোয়েনা যদিও আইভানহোকে প্রাণ দিয়া ভালবাসিত তথাপি রেবেকার দিকে চাহিয়া সে কোন দিন প্রকাশ করে নাই যে সে আইভানহোকে ভালবাসে । পাছে তাহার গুপ্ত প্রেম আইভানহোর কাছে ধরা পড়িয়া যায় এই আশঙ্কায় সে নিরন্তর সন্ত্রস্ত থাকিত । কিন্তু আয়েষার চরিত্রে এই মাধুর্য্য দেখিতে পাওয়া যায় না । বন্দীশালায় আয়েষা ওসমানকে বলিয়াছেন,—“এখনও বলি ওসমান ! এই বন্দী আমার প্রাণেশ্বর ।” আইভানহো ও জগৎসিংহের চরিত্রেও অনেকটা সামঞ্জস্য আছে । বন্ধিমবাবু বলিয়াছেন যে তিনি দুর্গেশ-নন্দিনী লিখিবার আগে আইভানহো পড়েন নাই । হইলেও হইতে পারে ; তবে তিনি যে ভাষা কথা ভাবিয়া গিয়াছেন তাহা অস্বীকার করিবার কোন কারণ নাই । এই সমস্ত বিষয় ভাবিয়া দেখিলে সাহিত্যে মৌলিকতার প্রাচুর্য্য সন্দ্বন্ধে সন্দ্বিহান হইতে হয় ।

বাংলা সাহিত্যে কবিদিগের বিষয় ভাবিতে গেলেও ঠিক এই কথাই খাটে । বিজ্ঞানসুন্দরের মৌলিকতা সন্দ্বন্ধে পূর্বেই আলোচনা করা গিয়াছে । মাইকেলের কাব্যাবলীতে ভাবের নূতনত্ব খুব কমই আছে । স্বয়ং সাহিত্য সম্রাট রবীন্দ্রনাথের গীতিকাব্যের মূলস্থরে বৈষ্ণবের বাঁশের বাশী ও বিদেশী ক্লারিওনেটের ঐক্যতান দৃষ্ট হয় । বস্তুতঃ রবীন্দ্রনাথ তাঁহার গীতিকাব্যের অনেকগুলি ভাবের জন্ম বৈষ্ণব কবিগণের নিকট ঋণী । কবির বিজ্ঞানসুন্দরের হাসির-গানে “হড্” ও “হংগল্-ডস্বির” অটুহাস্য শুনিতে পাওয়া যায় । এদেশে প্রাথমিক শিক্ষা-পদ্ধতি প্রবর্তিত করিয়া বিজ্ঞানসুন্দর মহাশয় চিরস্মরণীয় হইয়া গিয়াছেন ; কিন্তু একটু তলাইয়া দেখিলে টের পাওয়া যায় প্রাথমিক শিক্ষা-পদ্ধতি প্রবর্তনের বাহাদুরী একা বিজ্ঞানসুন্দর মহাশয়ের একচেটিয়া নহে । কারণ ইতঃপূর্বে উক্ত শিক্ষা-পদ্ধতি উদ্ভাবন করেন স্বর্গীয় রাধাকান্ত দেব বাহাদুর । বর্তমান কালের কবি ও ঔপন্যাসিকদের শতকরা নিরনব্বই জন সাহিত্য-সম্রাট রবীন্দ্রনাথ ও বিখ্যাত ঔপন্যাসিক শরৎচন্দ্রের নিকট ঋণী । এ সমস্ত বিষয় ভাবিয়া দেখিলে বুঝা যায় সাহিত্যে মৌলিকত্ব এবং নূতনত্ব কত দুলভ ।

বাংলা সাহিত্যের আখড়া খানাতালাসী করিয়া মৌলিকত্বের আভাষ তথায় কতটুকু আছে বুঝা গেল। এখন বিদেশী সাহিত্য ষাঁটিয়া দেখা যাক। যে “গলিভারের ভ্রমণ বৃত্তান্ত” (Gulliver's Travels) লিখিয়া Dean Swift অমর, তিনিও তাঁহার পূর্ববর্তী লেখকদিগের ঘরে সিঁদ কাটিয়াছেন। তাঁহার রচনায় তিনি “Voyages of Cyrano De Burgae” হইতে অনেক প্লট ধার করিয়াছেন এবং Godwin এর “Man in the Moon” হইতে লাইনকে লাইন তুলিয়া নিজের নামে ঢালাইয়া দিয়াছেন। আর সকলকে কাঁকি দিয়া গেলেও “ওয়াটন” তাঁহাকে হাতে নাতে ধরিয়া ফেলিয়াছেন। Godwin আবার তাঁহার লেখার জন্ত ‘Syrrano’র কাছে ঋণী। ট্যাসো সেখ সাদীর লেখা হইতে মাল-মসলা সংগ্রহ করিয়া জগতে অক্ষয় কীর্তি রাখিয়া গিয়াছেন। আবার সেখ সাদীর ভাব ও চিন্তার ধারা “তুরস্ক-ধর্ম-বিজ্ঞান” হইতেই প্রবাহিত। বস্তুতঃ সেখ সাদী স্বকীয় অপূর্ব রচনার জন্ত “তুরস্ক-ধর্ম-বিজ্ঞানের” নিকট ঋণী। Milton, Chaucer, Pope প্রভৃতি খ্যাতনামা লেখকগণ ও তাঁহাদের পূর্ববর্তী লেখকগণের নিকট হইতে ভাব ও প্লট ধার করিয়াছেন। নূতন আদর্শের কবিতা উদ্ভাবন করিয়া যে ইতালীয় কবি Plutarch অমর তাঁহার কবিতার ছন্দেও পূর্ববর্তী কবিগণের তাত্ত্বিক নৃত্য দৃষ্ট হয়। ইতালীর আদি ঔপন্যাসিক Bakasio পর্য্যন্ত তাঁহার সমসাময়িক লেখকগণের লেখা হইতে প্লট ধার করিয়াছিলেন। ফরাসী রঙ্গনাট্যের ওস্তাদ “মলিয়র” মৌলিকতার জন্ত দেশজোড়া আদর পাইয়াছিলেন; কিন্তু Menage তাঁহার নামে চুনকালী দিয়াছিলেন। Victor Hugo তাঁহার “ভিন্গাক্সজিনের” জন্ত ডুম্‌হসের পুঁজিতে হাত বাড়াইয়া ছিলেন। এ যুগের “ক্যানন ডায়ল” ও কম আদর পাইতেছিলেন না কিন্তু ভাগ্যে “এড্‌জার এলেনপো” ছিলেন নতুবা Sharlock Holmes এর সৃষ্টি অসম্ভব হইত। Mary Correlir “Sorrows of Satan” এবং “Ziska” প্রভৃতির প্লট পূর্ববর্তী লেখকগণের ভাণ্ডার হইতে নেওয়া। সাহিত্যে মৌলিকতার অভাবে এরূপ চৌর্য্যবৃত্তি নিরন্তর দৃষ্ট হয়। বস্তুতঃ ঘোলাইয়া দেখিলে মনে হয় লেখকেরা সবাই “চোরে চোরে মাসতুতো ভাই।”

তবে চোর দুই রকমের। এক রকম—গয়না চুরি করিয়াই বাহারা মহাজনের দোকানে বিক্রী করিতে যায়—তাহারা হাতে নাতে ধরা পড়ে। আর এক—চোরাই মাল আগে গালাইয়া নেয়, তার পর বিক্রী করিয়া বেমালুম সাধু বনিয়া যায়। গালাই করা গয়না কেউ চিনিতে পারে না সুতরাং শেষোক্ত রকমের চোর ধরা শক্ত হইয়া উঠে।

সাহিত্যক্ষেত্রেও প্রথম শ্রেণীর চোরেরা ধরা পড়িয়া সমালোচকের কলমের আঘাতে সাহিত্যক্ষেত্র হইতে অচিরাৎ গা ঢাকা দেয়। আমরা সন্মান করি শেষোক্ত চোরদের বাহারা অশ্রের জিনিষ চুরি করিয়া তাহার রঙ ফিরাইয়া পরস্বের মধ্যে নিজস্বের বিশেষত্ব ফুটাইয়া তোলেন।

নূতনত্ব এবং মৌলিকত্ব হিসাবে কোন সাহিত্যেই সর্বদ্বন্দ্বমুন্দর সৃষ্টি দেখিতে পাওয়া যায় না। যাহা পূর্বে একজন ভাবিয়া গিয়াছেন তাহা নূতন করিয়া ভাবিয়া নূতন রঙে আঁকিয়া সাহিত্যক্ষেত্রে উপহার দিলেই তাহা সাহিত্যক্ষেত্রের পূজারীদিগের নিকট আদর পাইয়া থাকিবে। তবে যাহা-তাহা একটা কিছু—তিনবহির মধ্য হইতে তিনটা কথা জোড়াতালি দিয়া একটা কাঠাম (foundation) সৃষ্টি করা উচিত নহে। কারণ সেই কাঠাম অসত্য ও প্রবঞ্চনায় পূর্ণ—ধূয়ার উপর প্রতিষ্ঠিত। সাহিত্যে এই রকম মামুলী মৌলিকত্বহীন রচনার আদর নাই। মিথ্যা প্রবঞ্চনার উপর সাহিত্য প্রতিষ্ঠিত নহে। সত্যই সাহিত্যের একমাত্র আশ্রয়। সত্য, নির্মলতা, সুসঙ্গতি এবং সুবিশ্রাস্যেই সাহিত্যের জীবন। সাহিত্য সুন্দর, পবিত্র এবং নির্মল।

শ্রী বীরেশ চন্দ্র চক্রবর্তী ।

অক্ষুটের ডায়েরী ।

“কুঁড়ির ভিতর কাঁদিছে গন্ধ অন্ধ হ’য়ে—”

—রবীন্দ্রনাথ ।

* * * আমি এসেছি গো, আমি এসেছি। আমার অক্ষুট কণ্ঠের অজানা বাণী নিয়ে, তোমাদের এই সঙ্গীত-মুখর মঙ্গল-আসরে আমি এসেছি। তোমাদের ঐ কুসুমিত উদ্ভানে, আজ শরতের এই আনন্দোৎসবে, হাস্ত-মুখর ফুলবালাদের সবুজ ঘাসের মাদুর পাতা মজ্জলিমে আমিও এসেছি—আমার অক্ষুট রূপের আকুলতা নিয়ে, আমার রুদ্ধ গন্ধের উচ্ছ্বাস নিয়ে। বিশ্বের সকল সঙ্গীত, সকল সৌন্দর্য্য যে আজ আমায় পাগল ক’রে ফেলেছে, তা’ই আমি আমার অক্ষুট গান নিয়েই, অক্ষুট রূপ নিয়েই ছুটে এসেছি—তোমাদের এই পরিস্ফুট রূপ-গানভরা বিশ্ব-সভায়। জানি না কোথায় আমার এ বুকভরা উচ্ছ্বাসের, প্রাণভরা আকুলতার পরিণতি!

* * * * *

বাঃ! আজকের এই প্রভাতটা কি সুন্দর! গত রজনীর অশ্রাস্ত বর্ষণের পর ‘ভেজা ঘাসের পাতার পাতার’, সিক্ত ধরার সরস শ্রামলতায় সূর্য্য কিরণ পড়েছে। মেঘ-মুক্ত

আকাশ অন্ধণের দীপ্ত গরিমায় হাসছে। কুঞ্জে কুঞ্জে ফুলেরা সব তরুণ রবির চঞ্চল চুম্বনে রক্তিম হ'য়ে উঠেছে। চারিদিকে একটি উজ্জ্বল সৌন্দর্যের আকুল শ্রোত ব'য়ে চলেছে। কি মনোরম! কি পরিপূর্ণ! কি সার্থক!—শরতের এই নবীন আয়োজন এই নবীন বিকাশ! ভোরের বাতাস আজ চারিদিকে চন্দন লেপে দিয়েছে! গাছে গাছে পাখীর কলতান, দিকে দিকে আজ সুরের আকুলি বিকুলি! ভোরের পাখী আজ সুরের লহরে আকাশ-ভুবন ছেয়ে ফেলেছে। পাশের ঘর হ'তে হার্মোনিয়মের সাথে একটা প্রাণ মাতানো সঙ্গীতের করুণ মূর্ছনা ভেসে আসছে। পাখীর কলতানের ভেতর এই শোনাচ্ছে বেশ সুন্দর। আমার ইচ্ছে হচ্ছে আমিও একটা গান করি। গানের আভাষ পেলেই আমার প্রাণ খুলে গাইতে ইচ্ছে করে। ভুলে যাই যে কণ্ঠ আমার অক্ষুট। গান অক্ষুট বলেই বোধ হয় গাইবার একটা ভীত ইচ্ছে আমায় মাতাল ক'রে তুলেছে। বুকের ভেতর আমার যে অবিশ্রান্ত গানের বন্ডা বইছে, যে একটা বিপুল গান আমার বুক থেকে বেরোবার জন্য অহরহ গুমুরিয়ে উঠছে তারই উচ্ছ্বাস আমায় মাঝে মাঝে উদ্গাদ ক'রে তোলে;—আর তখনি ব্যর্থতার একটা ব্যাথাভরা ব্যাকুল ক্রন্দন আমার অক্ষুট কণ্ঠ ছাপিয়ে ওঠে। আমি যে গাইতে পারি না। বুকে আমার অনেক গান ও অনেক সৌন্দর্য,—কিন্তু তারা যে ভাষা পায় না, তারা যে ফুটে পায় না। ওগো! আমি যে অক্ষুট গো, আমি যে অক্ষুট! শরতের এই পাগল-করা রূপ-গানের পূর্ণ পরিস্ফুটতায় আমি যে অক্ষুট কলি, আমি যে অক্ষুট গান; বুকে যে আমার অক্ষুট রূপ-গানের অতৃপ্ত কামনা!

*

*

*

*

আজকের এ রাত্রিটা তার শরতের বিশেষত্বটুকুকে পূর্ণ ক'রে তুলেছে। এতটুকুও ফাঁক রাখেনি, যাতে ক'রে কেউ বলতে পারে—এ শরতের রাত্রি নয়। চাঁদে তার শরতের হাসি, জ্যোছনায় তার শরতের ঢল ঢল লাগি, আকাশে তার শরতের প্রশান্ত নীলিমা। আমার প্রাণে আজ একি আনন্দ! আমি যেন আজ কোন্ এক আনন্দের সাগরে স্নান ক'রে এসেছি। চোখে যেন কে আজ আমার আনন্দের অঞ্জন এঁকে দিয়ে গেছে। যা দেখছি, তাই সুন্দর, তাই আনন্দময়! আমার চারিদিকে যেন একটা অবিশ্রাম আনন্দহিল্লোল নৃত্য করছে! কি সুন্দর—আজকের এই রাত্রিটা!

এদিকে তোমরা আবার একি করছ ভাই? রাশি রাশি ফুল এনেছ; ধূপ ধূনায় ঘর আমোদিত করেছ, শুদ্ধ গভীর স্তব গান করছ—এ দিয়ে কি হবে ভাই? এঁ্যা! পূজো! মায়ে পূজো! বাংলা-মায়ে পূজো করছ তোমরা! কেউ ডালা ভরে ফুল সাজিয়ে

এনেছ, কেউ শুভ্র যুথির মালা গেঁথে এনেছ, কেউ এনেছ বেলী-গোলাপের গুচ্ছ । কেউ এনেছ,—
মায়ের পায়ের মল,

কেউ এনেছ বালা,

আবার কেউ এনেছ

হৃদয় নিংড়ে ভক্তি—

চন্দন অঞ্জলি ।

চোখে তোমাদের প্রেম-ভক্তির পবিত্র দীপ্তি,* বুকে তোমাদের মাতৃপূজার বিমল তৃপ্তি,
মাথায় তোমাদের মায়ের মঙ্গল আশীর্বাদ । বাংলাভরা আজ বাংলামায়ের পূজা, জগৎভরা
আজ বাংলামায়ের স্তবগান । আমায়ও নাও ভাই ! তোমাদের ঐ রাশি রাশি ফুলের
ভেতর আমায়ও আজ নাও ভাই । আমায়ও আজ তোমাদের হাতের অর্ঘ্য ক'রে মায়ের
চরণে ফেলে দাও ভাই ! ওগো ! আজ আমার অক্ষুট জীবনকে বিকশিত ক'রে, পূর্ণ ক'রে,
সফল ক'রে দাও গো—তোমাদের ঐ নিপুণ হাতের মঙ্গল-স্পর্শে । আমায় আজ মায়ের
পূজার যোগ্য ক'রে দাও । আর ঐ কৈগো তোমরা মায়ের বন্দনা গাইছ;—আমার ছিন্ন
ওদ্বীর অক্ষুট তারকে তোমরা আজ বাজিয়ে তোল গো, তোমরা আজ তার রুদ্ধ গানের
বিপুল উচ্ছ্বাসকে মুক্ত ক'রে দাও । ওগো ! তাকে মায়ের গানের যোগ্য ক'রে দাও ।
কি ? দেবে ! আমার এই অক্ষুট জীবনকে ফুটিয়ে দেবে তোমরা ! ও মা ! কি তৃপ্তি !!

—অক্ষুট ।

পরিচয় ।

“ভরস্কেং যন্ন দীয়তে।” ফুল আপনার যা’ কিছু সব বাতাসের বুকে বিলিয়ে দিয়েই আপনার অস্তিত্বের সার্থকতা সম্পাদন করে। এই বিলানোতেই তার তৃপ্তি, এ’তেই তার আনন্দ। কুঁড়ির ভিতরে গুম্বে-কাঁদা গন্ধকে প্রকাশের অভিসারে পাঠানো’তেই ফুলের জীবনের সার্থকতা। প্রাণ যখন আপনাকে বিশ্বে বিলিয়ে দেয়, তখনি তার সার্থকতা লাভ হয়। কিন্তু মানুষের নিজের বিশেষত্ব এবং মনের প্রতিচ্ছবি বিশ্বের সামনে ধরতে হ’লে চাই একটা অনুকূল অবসর—একটা অনুকূল আব’হাওয়া। আত্মপ্রকাশের একটা ভীত আকাজক্ষা সকলের হৃদয়েই আছে। এই আকাজক্ষা, এই প্রেরণাই সাহিত্যসৃষ্টি ও সাহিত্যানুশীলনের মূলে। এই প্রেরণার ইন্ধন যোগায় একটা অনুকূল বাতাস, একটা অনুকূল ক্ষেত্র, অনুকূল আব’হাওয়া— যাকে বলে Literary atmosphere. এই আব’হাওয়ার আমেজ লেগে মানুষের সৃষ্টি-শিখিল প্রতিভা পরিপূর্ণতায় উচ্ছল হ’য়ে উঠে। আমাদের মনের গোপন কোণের আকুল ভাবকে গ্রহণলাগা যক্ষপুরীর সংস্কারাচ্ছন্ন গভীর মাঝে বন্দী ক’রে, নিজেকে বিশ্বের সবার কাছ থেকে হরণ ক’রে রেখে আত্মবঞ্চনা করেছি। তারি জঘ একটা অনুশোচনা, তারি জঘ প্রাণের একটা অতৃপ্ত আকাজক্ষাই যেন আমাদের হৃদয়ের অক্ষুট অথবা অর্ধক্ষুট ভাবগুলিকে তুলির আঁচড়ে বিশ্বের সামনে মূর্তিমান ক’রে ফুটিয়ে তুলতে চেষ্টা পাচ্ছে। আমাদের পূর্ববর্তীগণ বোধহয় এজঘই পত্রিকাখানিকে অক্ষুট ভাবের বাহন মনে ক’রে তার নাম অক্ষুটই রেখেছিলেন।

১৩৩০ সনের ভাদ্র মাসে শরতের এক বৃষ্টিভেজা প্রভাতে তরুণ রবির চঞ্চল চুম্বনে আরক্ত হ’য়ে অক্ষুট জন্মেছিল। পাখীর কলগানে, প্রভাত-বায়ুর উন্মত্ত প্রণয়-প্রলাপে, উষার লাজুক আলোর আকুল পীড়াপীড়িতে অক্ষুটের কণ্ঠে স্বর ফোটেনি। ক্ষণিক-দিনের আলোকে ক্ষণিকের গান গেয়ে সময়ের বুকে একটা কালির পৌচ রেখে সে করে পড়ল—অক্ষুট চিরদিনের মত অক্ষুটই র’য়ে গেল।

আজ তিন বছর পরে অক্ষুটের জীর্ণ-কঙ্কাল মূর্তির খোলস প’রে আমাদের প্রাণে নূতন প্রেরণা ও উদ্দানার সৃষ্টি করেছে। আমরা তাই তার ঝড়ঝরা পাপড়ীগুলিকে তুলির পৌচে রত্ন ক’রে তুলে তাকে প্রকাশের অভিসারে পাঠাচ্ছি। অক্ষুটের মনের বাসনা কতদূর চরিতার্থ হয় জানি না। সাফল্য ভগবানের হাতে।

অক্ষুটের সৃষ্টি-শিখিল দেহে শাস্তিবান্ধি-সিঞ্চে নবজীবন দান করলুম। আমাদের পাছে ঝাঁরা আসছেন তাঁরাও যেন আমাদের রোপিত এই মহীকৃৎসকে সরসতা ও সজীবতা দানে চিরন্তন ক’রে রাখেন—তাঁদের কাছে এই আমাদের সনির্বন্ধ অনুরোধ।

আমাদের কথা।

অক্ষুটের প্রথম সংখ্যা বাহির হইল। দ্বিতীয় বার্ষিক শ্রেণীর ছাত্রগণের পরীক্ষা থাকায় অনেক বাধা বিপত্তি লঙ্ঘন করিয়া আমাদের চলিতে হইয়াছে। তাঁহারা অচিরে হোষ্টেল ছাড়িয়া চলিয়া যাইবেন এজন্য খুব তাড়াতাড়িতে আমাদের পত্রিকাখানি বাহির করিতে হইল। এজন্য পত্রিকাখানি আকারে খুব ছোট হইল এবং অনেক ভুল-ত্রুটিও রহিয়া গেল। আশা করি সময়ের অভাবের বিবেচনা করিয়া সুধী পাঠকবৃন্দ আমাদের এই ত্রুটি-বিচ্যুতি ধরবেন না।

সাধারণ পাঠাগার—আমাদের সাধারণ পাঠাগার আমাদের একটি গৌরবের বিষয়। বাংলা ইংরেজী সাময়িক প্রায় সবগুলি প্রসিদ্ধ পত্রিকাই আমাদের সাধারণ পাঠাগারে আছে। দৈনিক পত্রিকার সংখ্যা ৪, সাপ্তাহিক ৫, এবং মাসিক ২০ খানা। এতদ্ব্যতীত দাবা, ‘লুডু’ ‘স্নেক-এণ্ড-লেডার’ ‘হেল্মা’ প্রভৃতি খেলার বেশ সুবন্দোবস্ত আছে। আমাদের পাঠাগার প্রত্যহ ৫ টা হইতে ৮টা পর্য্যন্ত খোলা থাকে। হোষ্টেলের প্রায় সমস্ত ছেলেই রোতিমত পাঠাগারে পত্রিকাপাঠ ও ক্রীড়াদিতে চিত্তবিনোদন করিয়া থাকেন। সেক্রেটারী খন্দকার লুৎফের রব্বানী ও এসিস্টেন্ট সেক্রেটারী ত্রীমণী মোহন রায়ের পরিচালনায় পাঠাগারের কার্য বেশ শৃঙ্খলার সহিত চলিতেছে।

খেলাশ্রুতি—আমাদের হোষ্টেলের ছাত্রগণ নিয়মিতভাবে ফুটবল, ক্রীকেট, বাস্কেটবল, হকি, টেনিস, ভলি, কপাটী, দাড়িয়াবাক্স প্রভৃতি বিবিধ খেলায় উৎসাহের সহিত যোগদান করিয়া থাকেন। এতদ্ব্যতীত অনেকেই নিয়মিতভাবে মুগুরভাঁজা, ‘প্যারালালবার’ প্রভৃতি ব্যায়াম করিয়া থাকেন। কলেজের ফুটবল ও হকি টিমের প্রায় অধিকাংশ খেলোয়াড়ই আমাদের হোষ্টেলের। এবার বর্ধমান মেডিক্যাল স্কুলের ফুটবল টিম আমাদের সহিত খেলায় তিন গোলে হারিয়া গিয়াছে। এবার “শম্মনিধি লিগ্ শিল্ডের” খেলায় আমাদের কলেজ টিম উয়ারী ভিন্ন অন্য সমস্ত টিমকে হারাইয়া শিল্ড লাভ করিয়াছে। এই সমস্ত প্রতিযোগিতামূলক খেলায় আমাদের হোষ্টেলের খেলোয়াড়গণ অসাধারণ কৃতিত্ব দেখাইয়া সকলের প্রশংসাভাজন হইয়াছেন। এবার কলেজের বাৎসরিক ক্রীড়া-প্রতিযোগিতায় আমাদের হোষ্টেলের ছাত্রগণই অধিকসংখ্যক পুরস্কার লাভ করিয়াছেন।

সাহিত্যসেবা—আমাদের কলেজ ম্যাগাজিনে আমাদের হোষ্টেলের ছাত্রদের লেখাই বেশী। আমাদের অনেকেই বাংলার বিবিধ সাময়িক মাসিক পত্রে লিখিয়া থাকেন।

তবে আমাদের সাহিত্য-সমিতি বলিয়া কিছু ছিলনা! এখন হোফেলের ম্যাগাজিন বাহির হওয়াতে এদিকে সকলের দৃষ্টি পড়িয়াছে।

স্বেচ্ছাসেবক সমাজ—আমাদের হোফেলের ছাত্রসংখ্যা খুব কম। গত অক্টোবর মাসে উপলক্ষে আমাদের হোফেল হইতে প্রায় ৭৫ জন স্বেচ্ছাসেবক শান্তিরক্ষার জন্য গিয়াছিলেন। মাধবগোড়ীয় মঠের উৎসব উপলক্ষে আমাদের স্বেচ্ছাসেবক-সমাজ সেখায় গিয়া স্বেচ্ছাক্রমে কার্যনির্বাহ করিয়াছে। রামকৃষ্ণ মঠে বিবেকানন্দের জন্মোৎসব উপলক্ষে আমাদের স্বেচ্ছাসেবকগণ বিশেষ কর্মকুশলতার পরিচয় দিয়াছেন।

উপসংহার—সময়াভাবে এবং স্থানাভাবে আমরা অনেকের লেখা এ সংখ্যায় প্রকাশিত করিতে পারি নাই। তাঁহাদের লেখা পত্রিকায় বাহির হয় নাই সাহিত্যক্ষেত্রে স্থান সম্বন্ধে তাঁহারা যেন নিরাশ হইয়া না পড়েন। হোফেলের যে সব ছাত্রবন্ধুর ঐকান্তিক আগ্রহে ও অক্লান্ত পরিশ্রমে “অক্ষুট” প্রকাশিত হইল তাঁহাদিগকে আমরা আন্তরিক ধন্যবাদ জ্ঞাপন করিতেছি। অনেক প্রতিকূলতা-নিবন্ধন আমরা এ বৎসর পত্রিকাটিকে সর্বদ্রুত করিতে পারিলাম না। আশা করি আমাদের পরবর্তী ছাত্রবন্ধুগণ আমাদের এই ক্ষুদ্র প্রচেষ্টাকে অয়যুক্ত ও সাফল্য-মণ্ডিত করিবেন।

